

東
華
續
錄

臣朱壽朋敬編

臣沈彭年恭校

九月甲辰朔升奏奴才於六月二十九日曾將赫政復至印營情形附片陳明在案計自該稅司復往獨脊嶺又將兩月奴才迭次專函催促近接該稅司復函據云英人近日已將納湯日納宗等處之兵陸續撤退惟會議尙多推宕須候總理衙門回文照辦等語近又據各路探報回稱英兵於七月二十五六等日所有納湯日納宗之兵連日撤退惟納湯尙留一營人數不多又西金部長所住扛多地方亦留有印兵數百餘則均已退出哲境等情又哲孟雄部長連日遣其弟來營稟知謂英官於本年七月二十三日向該部長云稱如今西金之地全歸拔楞爾王必須自誓約據與我收執否則必有大禍臨身該部長云稱我之圖記現在春丕我母處收存此等大事我亦不能冒昧出結詎料哲逆康薩卓尼爾頗當喇嘛等私出約據由伊等蓋用圖記呈遞英官吳日會議若以此結爲詞請將我部長歷次遞呈稟件所用圖記查對卽知真僞我哲孟雄部長並未出結等情查哲夷若存若亡首鼠兩端固久已如是然此番藏印搆兵本由該部而起英人既恃強戰勝藏兵又蒙 皇上飭派奴才爲之妥辦去年會議該印官開來七

款自折回仁進岡竭力辦理藏番於遵 旨罷兵之後既允在咱利分水之嶺劃界又允在藏地通商我朝之於彼國可謂仁至義盡今藏兵既撤英兵亦已漸退若不早爲定約竊恐藏番候之過久見英人故意遷延又起疑慮於前或有反覆或被哲夷唆弄枝節另生現在雖絕無是事然奴才不能不格外思患豫防擬請 飭下總理各國事務衙門會商駐京英使電知印督從速定議立約不得任意羈延一面飭知稅務司赫政妥速辦理庶邊事早期定局免使藏番疑慮別生枝節緣風聞藏中僧衆有云我等原不欲與洋人交接因駐藏大臣奉 旨辦理邊務故不敢不遵如英人久不立約必係心存反覆爲將來生事地步若刻下早爲了息則已倘再刁難我等與其同有仇之英國讎和莫若與無仇之俄人通好俄人前次來藏我等備禮勸阻俄人立即退去頗講情理今英人謀奪我地偶爾戰勝遂如此欺凌衆情實有不甘等語查去年俄人有由和闐至藏之請奴才奉文後早已行知商上如英人再行刁難近來藏中喇嘛敗類甚多本年蒙古人山草地來禮佛者絡繹不絕隨來人類頗雜俄人由北道前來設藏番私與通款是非奴才連在邊界所能稽察保爾現駐獨脊嶺不在納湯又不能面向催促邊事久不定局藏俄或私行援引英俄必互相猜忌即恐西藏後來有事之日更多午夜思維亟宜先事籌慮合無仰懇 天恩飭令駐京英使早爲電催印督定約則藏人知前案已結必不多事可弭將來無限弊端實於藏印均

大有裨益下所司知之○乙巳諭吏部奏遵議太常寺堂屬各官處分一摺奎潤榮惠壽昂克們太左念謙均著改爲降二級留任奉祀劉世印著照所議降一級調用再罰俸一年俱不准抵銷○諭本日副都統謙光呈遞請安摺跪請二字俱於首行連寫殊屬不合謙光著交部議處○戊申諭步軍統領衙門奏公務日繁擬請添設員缺以敷分撥一摺著該部議奏○諭定安等奏辦賑出力各員請旨獎敘等語上年奉天水災記名提督左寶貴會辦賑務籌集工款盡心撫恤全活災民甚衆洵屬異常出力左寶貴著遇有提督缺出儘先題奏奉錦山海道誠勳候補道臧良壽辦賑務均屬著有微勞誠勳著交部從優議敘臧良壽賞加二品頂戴以示獎勵○禮部奏本年八月二十四日天壇祈年殿被雷火延燒經臣等將起火情形奏明在案當將所奏各節行知工部去後臣等連日前往查看延燒情形瓦木均各無存灰土堆積甚厚恭查殿內正位原有石臺一座上面木欄杆並前面石階三出陛各五級東西配位石臺各統一階其地平原係青石圍墻均經燒裂多有酥齟轉瞬祈穀祀典攸關刻不容緩若不及早興修屆期深恐有誤相應請旨飭下工部作速辦理以重要公而崇體制查此項工程費繁工鉅恐非尅期所能告竣而明春大祀在邇自應及早籌備然祈穀大典關係甚重應如何變通辦理之處臣等未敢擅擬惟有請旨飭下廷臣會議抑或由禮部會同臣等妥議具奏伏候訓示遵行上諭

太常寺奏請飭修興工一摺 天壇 祈年殿祀典攸關著工部奏明派員敬謹勘估請旨辦理至明
春 大祀伊邇應如何變通舉行之處著禮部太常寺會同妥議具奏○己酉會國荃奏查上海製造局
儲有成大帆船一隻不堪行駛久泊浦江日受風潮勢必蝕朽廢棄現因招商局需用躉船克購爲難請
將該帆船撥給該局修改以作躉船於製造局既省看守之煩於商局亦免另購之費一轉移間兩有裨
益等情臣查核所請與海安輪船撥歸商局改作躉船之案情事相同似可照撥下所司知之○庚戌命
游智開署理廣東巡撫○甲寅諭奎煥等奏應行急修工程請派大員查勘一摺 奉東陵寶頂方城應
修工程著派崇禮敬謹查勘奏明辦理○吏部尚書錫珍卒賜卹如例○乙卯諭巡視西城御史富光等
奏棍徒誘法咆哮毀壞衙署請交部審辦一摺本月初六日有常太因與白姓等口角自稱覺羅赴西城
副指揮署喊告當經傳訊膽敢大肆咆哮並有推翻公案毀壞門窗情事實屬目無法紀著交刑部提案
嚴行審訊照例懲辦○丙辰以麟書爲吏部尚書嵩申爲刑部尚書松森爲理藩院尚書熙敬爲都察院
左都御史○楊昌濬奏 上承准軍機大臣字寄光緒十五年二月二十七日奉 上諭鍾泰奏請撥礮機
以備操防一摺據稱寬夏滿營向無新式鎗礮附近無從購辦旗營無款可籌請就近由陝甘總督撥給
陸戰洋礮數尊洋鎗一千桿配齊子藥運解來營等語卽著該督酌量籌撥俟應用將此諭令知之欽

此遵 旨寄信到直隸查甘省關內肅清之後並未添買近年新式軍火局存儲備無多均係撤營時收繳舊器隨時修整勉供防練營旗操防之用 旨今年二月到任後迭次與司道籌商設法採購以欸項支絀尙未定議今鍾泰擬於寧夏滿營挑選精壯實爲整頓邊防起見所請鎗礮自應欽遵酌量籌撥並經該將軍先後委員請領前來當飭營務處提撥前膛銅礮四尊來福洋鎗五百桿配合圓鐵彈子二百顆土洋藥二千斤土藥方十斤大洋火二十五萬顆點交委員領運回營以資操防下兵部知之○丁巳諭張曜奏查明被災各屬請緩徵上忙錢糧一摺山東濟南等屬各州縣上年秋收歉薄本年青黃不接二麥被災若將上忙錢糧照常徵收民況實有未逮加恩著照所請該撫卽刊刻謄黃悉行曉諭務使實惠均霑毋任吏胥舞弊用副軫念民艱至意○俞嵩申爲會典館副總裁○甲子陳彝奏 旨承准軍機大臣字寄光緒十四年七月初四日奉 上諭有人奏各省茶莊多招婦女入廠揀茶案情百出請飭嚴禁等因欽此遵 旨寄信前來 旨遵卽恭錄行司暨淮北牙釐皖南茶釐等局及徽州寧國六安等產茶各屬飭令確查嚴禁去後茲據藩司阿克達春彙核詳稱安徽省茶市以徽州府屬之屯溪六安州屬之麻埠等處爲大宗每屆開市之時窮苦婦女藉揀茶以謀口食由來已久各莊廠分內外居男工專司烘焙內居女工專司揀摘婦女近者晚各歸家遠者借居親族查無旅店露宿之事惟是人跡錯雜良莠不齊歷

屆茶春該地方官會同局員嚴密查察商民相安亦無釀成人命之案此外產茶之區非商集之所市面皆小雖亦間有婦女揀茶而人數無多防弊較易並經官吏隨時訪察均稱安靜並無前項情弊等情臣覆查無異伏思安省茶莊婦女揀茶係貧家生計所關勢難概行禁絕而世風澆薄流弊易滋極應實力防閑以杜奸徒勾引生事本屆新茶上市已通飭產茶各屬地方官會同茶局委員申明禮法曉以廉恥大禮使各知所遵守仍諭各茶廠認真稽察彈壓倘有前項情弊即行從嚴懲辦以挽澆俗而正風化報聞○王文韶奏據原任湖南巡撫劉崑之孫丁憂戶部主事劉式衡江蘇試用知府劉式通呈稱故祖父崑原籍雲南景東直隸縣由翰林院編修渥蒙 累朝恩遇屢掌文衡洊躋卿貳同治六年 簡放湖南巡撫十年冬奉 旨來京另候簡用以年衰多病陳請病痊入都因原籍景東兵燹之後屋宇蕩然流寓湘省一十六載自祖父歿後又已二年伏查民間入籍但有田廬墳墓在二十年以上例得准行今式衡等原籍已無家可歸流寓亦將及年限祖父墳墓均在湖南呈請改入湖南善化縣籍以便就近照料等情據此臣查定例罷職文員寄居別省本身既歿子孫有田土丁糧已入別省版圖者回附籍均聽其便今原任湖南撫臣劉崑自解任後即在湖南省寓居養病現已身歿伊孫劉式衡等以原籍無家可歸祖父墳墓皆在湖南呈請就近改入湖南善化縣籍核與定例相符惟係已故大員後嗣呈請改籍自應奏

明立案下部知之○乙丑予故貴州按察使席寶田於本籍及立功地方建祠戰功事蹟交國史館立傳
○丙寅以全漕告竣予興廉游百川等獎敘有差○丁卯祭 歷代帝王廟遣載勛行禮○諭署巡視中
城御史崇齡等奏援案請賞外城粥廠粟米開單呈覽一摺現在節交寒令貧民生計維艱所有中城之
朝陽閣東城之臥佛寺育嬰堂南城之打磨廠西城之長椿寺甄塔胡同北城之圓通觀梁家園各粥廠
每月共需粟米三百三十石加恩照數賞給自十月初一日起由各該城咨明戶部剗倉給發該御史等
務當督同紳士妥爲散放毋任侵漁單併發另片奏請賞給崇善堂等處米石各等語崇善堂等處各廠
收養貧民人數衆多米石不敷支放加恩照所請所有清化寺街之崇善堂梁家園之百善堂大清觀
之公善堂三處煖廠各賞給粟米三百石教子胡同禮拜寺賞給粟米三百石朝陽門外南海會寺崇文
門外玉清觀各粥廠並岡子上興善煖廠各賞給粟米一百五十石東便門外三忠祠粥廠賞給粟米一
百五十石以濟窮黎○戊辰以鄭紹忠爲廣東高州鎮總兵○是月日斯巴尼亞國署理使臣鄂尼思卒
參贊羅鄰德署理

冬十月癸酉朔時享 太廟 上親詣行禮○丙子色楞額奏伊犁地方自精河大河沿西來向以果子

溝爲孔道所有轉餉餉械馳齎文報以及商旅往來無一不由此行走果子溝卽塔勒奇山自松樹頭以

達溝口計程約六十里該兩山夾束一徑中通險峻如關林木茂密嶺深涌泉多處益以雪水匯爲溝流廣仁綏定一帶地畝藉資灌溉百餘年來獲利良非淺鮮兵燹之後伊犁收還該處建木橋二十六道遇有毀壞隨時設法籌款補修並未照工程估報詎去歲伊犁冬雪至大果子溝甚深至丈餘道途爲之壅塞雖派有營兵棚簍奈竭數日之工力不及頃刻之迷漫內外山山壁削儼若列屏雪積一厚輒自崩摧長至百數十丈不等多年老樹隨雪擁倒中僅一線官路時被堆壓行走頗覺不易今年春雪較上冬尤甚入夏以來繼以連日傾盆大雨天暖雪融四山積水漲發陡於五月初六十三等日破溝而出橋梁全行拉毀竟乏寸椽道路悉被刷衝直成巨壑車馬難通徒步者亦無處繞越詢諸父老謂曠世未有之險工月餘之久大雨時行積雪日化水勢未能稍減人力實無法可施果子溝以東西要道現在續運阻隔商旅斷絕遣撤兵隊亦未能起程驛路不可一日不通如此情形非趕緊另行設法誠恐貽誤時局所關匪細伏查關里沁溝東出登努斯口直達精河山行約三四站遠比果子溝尙覺便捷略加修治來往可通惟中有數段地形低陷如釜冬令積雪過深斷難掃除似非果子溝祇數十里程途稍易爲力且關里沁相距精河明較果子溝爲近昔人會近就速煞費經營揆時度勢良有深意奴才以井蛙之見成規舊制何敢率事更張遂據派署瞻德城營參將賈逢寅帶領匠夫星夜先往關里沁相度路徑形勢趕速設

法開辦高阜者略削平之有溝壑者又木爲渡餉項由此西來撤勇由此東去客商人民藉此亦暫過來往原因果子溝工程浩大非旦夕所能奏功不得不作權宜之舉一俟水勢稍退坑壑漸乾即便修復故途爲久遠計現據稟報蘭里沁業已工竣適果子溝水亦漸消當經批令該署參將趕將前項匠夫人等移往果子溝會同署鎮標左營游擊陳甲福所帶工役建造橋梁修治道路併力合作務令悉成坦途其有應添橋道四處亦須相度形勢一律加修此次山水陡發既大且久其衝刷者非深溝長溝卽懸崖絕壁爲功不易所費尤多奴才再四籌度惟有飭派委員按照定例章程丈尺做法切實撙節估計石木匠作約需四五千六百工日各給銀二錢五分壯夫六萬二千餘工日各給銀二錢加以灰料木石器具運脚等項各計銀一萬六千數百兩蘭里沁工雖甫竣所用欸目尙未據細具報約略計之亦在二千兩上下東西山口長二百五六十里均擇其緊要處修治暫利往來聊顧目前之急難期經久若必一勞永逸爲數當更屬不貲以上兩欸明知乃意外所需而反撥詳籌萬難再事核減果子溝爲自古衝途驛遞與餉運攸繫此次修竣後一年之中橋梁道路駝馬踏損車輜碾磨及一切不及料之微工時所必有其或兵丁冬令掃雪墮指裂膚情殊可憫尤須酬以犒賞之資惠以禦寒之具通盤合算擬備歲修銀八百兩皆由督後欸內按年提用俟地方稍形富庶再行另籌除分別造具估冊咨部外相應一併籲懇 天恩

飭部立案由督後項下如數動用俟前項工程完竣併案報銷斷不任承辦人員稍涉欺冒致沾虛糜以期仰副 朝廷眷懷邊域慎重庫儲之至意下部知之○諭定安等奏請派員驗收工程並請擇吉恭請神牌還御一摺 永陵啟運殿等工現已完竣著欽天監於十月內敬謹選擇吉期知照定安等屆期恭請 神牌還御此項工程著派綽宜驗收○戊寅諭軍機大臣等前據李鴻章覆奏張家口管理牧羣主事文鑑被參各款當經降旨將文鑑革職永不敘用並諭令托倫布將該處牧政實力整理茲有人奏該都統並不驅逐文鑑出境輒為置買田產多方慰留並將原告鄂尼巴圖等解任訊辦勒令出具誣捏甘結現聞此案非刑致命者已有二人蒙古被冤各家相約京控該都統密計阻留復希圖押荒地價招民墾種牧廠以致廠地日窄等語著李鴻章按照所參各節確切查明據實具奏○諭譚鈞培奏藩司呈請開缺終養據情代奏一摺雲南布政使曾紀鳳著准其開缺○以史念祖為雲南布政使王德榜為貴州布政使○己卯諭詹事府左庶子崇文片奏參劾大學士張之萬接納外官各節當派福錕潘祖蔭查奏茲據查明覆奏該大學士接見外官或因面詢公務或係素有來往不得指為結納營私北沙瀘廟宇外官來京者往往寓居非自今始不得因與張之萬寓所相近遂指為賈緣奔競該大學士住居湫隘並無另設會客堂專談機密之事至所參僧人靜洲最為親密傳訊該僧據稱與張之萬同鄉認識素有往

來並未干預別事各等語朝廷用行政一秉大公從不稍持偏見張之萬老成穩練朝廷素所深知惟此次君不將參款確查虛實轉無以得是非之真既經福錕逐一查明均無實據所參各節卽著毋庸置議前因臣工挾私參劾迭經明降諭旨申誡再三以杜攻訐之漸該庶子豈無聞知乃輒以無據之詞誣謗大臣復敢附會災祥希圖發跡至另摺附片所陳天文時務各節諸多謬妄若不加以懲處無以爲逞臆亂言者戒崇文著交部議處原摺片均著擲還張之萬宣力有年受恩深重不得因被人奏參遇事引嫌卻避惟當小心謹慎益加奮勉力圖報稱用副朝廷委任至意○諭禮部尙書奎潤兵部左侍郎徐用儀工部右侍郎清安均著加恩在紫禁城內騎馬○辛巳諭崧峻奏查明各屬續被水災籌辦賑撫一摺本年秋間浙江杭州嘉興湖州等府屬雨水過多田禾被淹災情甚重饑民困苦艱難深堪憫惻現經崧峻酌撥銀穀勸放倉米並派員運糧平糶分別賑撫卽著飭屬認真籌辦妥速散放所有銀米准其作正開銷務期實惠及民毋任稍有弊混所有衝塌堤圩各工並著趕緊籌修以衛農田○壬午京師雪○甲申升泰奏奴才接據獨甯循探事人稟報謂英人近擬撤兵之後一切仍照上年舊章不必辦理通商亦不必另立新約等情竊思通商一事本英官初次會議時卽行提及隨又屢言西人欲到藏貿易奴才答以番情疑詐辦理萬難然後許退至江孜力言再四又許退至帕隘仍復力拒英官意甚憤然彼時察番

交涉之案英人實首重通商否則有萬難了結之勢是以奴才移營仁進問於飭辦通商一事實大費氣力始據藏番出具遵結今英人忽而不言通商蓋當日英人深知藏番於此事力拒數年意謂藏番必不遵行故事將通商之事要求藉以爲難藏使今知藏番出結遵辦從此定約之後他國有聞亦必援以爲請此後藏地爲各國通商之地則非英人可以任意欺凌不便於己是以忽議中止且漢番因商務在邊與獨資傾軋思相通彼族一舉一動不難立悉然而英人如此時不讓通商藏人實大爲深願但能不自啟弊端亦未嘗不可暫保無事俄人亦不能有所干求目前甚可少事但日後防範宜嚴未可再涉疏懈耳總之英人無論是否通商現藏印均已退兵前怨既釋自應彼此立約以昭信守否則應由赫政取其印督切實完案照會奴才亦取藏番完案切結照覆印督彼此互換庶幾實事求是差足上慰 聖主西顧之憂而彼族熟計深思誠恐一經定約卽受束縛不能狡焉思逞故任意延緩彼之居心不過如是惟本年入夏以來漢番專待覆信直至此時奴才在邊多駐一日卽多一日用費曠日持久殊覺虛糜應請飭下總理各國事務衙門速商英使迅電印督趕緊辦理早完鉅案奴才不勝迫切延望之至下所司知之○丁亥驗本年江蘇久雨爲災自八月以來連旬不止蘇州鎮江常州松江太倉各府州屬俱遭水患兼以浙西皖南蛟水下注江湖並漲禾稼淹沒糧價陡長該省猝被奇災朕心實深憫惻著於該省藩

庫撥銀五萬兩以資急賑復欽奉 慈禧端佑康頤昭豫莊誠壽恭欽獻皇太后懿旨著發去宮中節省
內帑銀五萬兩作為蘇州等處賑款卽著剛毅分別災區妥速散放用副深宮軫念窮黎至意欽此該撫
務當敬體 慈懷督飭卽委各員核實經理毋任稍有虛糜一面確查各屬災情並將現在賑恤情形馳
奏以憑 聖裁該處錢漕賦課並著查明分別奏請蠲緩紓民力倘地方官有匿災不報情事卽行據實
嚴參以爲玩視民瘼者戒○諭本年秋間浙江大雨連旬水勢漲發杭州嘉興湖州甯波紹興台州金華
嚴州溫州處州俱被水災前據松駿奏報諭令妥爲撫恤茲據續報杭嘉湖三府情形最重復降旨令該
撫酌撥銀米速籌賑撫准其作正開銷惟該省被水之區多至十府且係秋後成災民情益形困苦朝廷
念切痼瘼無時或釋加恩著於浙江藩庫提銀五萬兩作為賑撫之需並欽奉 慈禧端佑康頤昭豫莊
誠壽恭欽獻皇太后懿旨浙江遭此奇災深堪憫惻著於宮中節省內帑項下發去銀五萬兩交松駿妥
速賑濟以全民命欽此該撫當仰體 聖慈軫念黎元有加無已至意迅卽確查災區妥爲分撥並遴派
公正官紳認真散給務期實惠及民毋任稍有弊混各該府屬錢糧賦課應如何分別蠲緩之處卽著查
明具奏候旨施恩倘有不肖州縣希圖浮收匿災不報卽行從嚴參辦一面將現在賑撫情形先行馳奏
以慰屬系昨據御史張家祿奏甯紹兩府官紳前經辦有積穀請飭支放等語著松駿飭令迅卽開倉發

賑此外各府州縣如有積存備荒錢糧均著一體散放不准劣紳把持舞弊致滋浮冒○諭吏部奏遵議處分一摺詹事府右庶子崇文著照部議卽行革職○戊子賞給八旗及綠步各營官兵半月錢糧○賞給閒散宗室覺羅人等一月錢糧宗室覺羅孤寡於恩賞錢糧外再加半月錢糧○山西巡撫衛榮光以病免○己丑平陰喬奏各州縣捕役之設所以緝拿盜賊乃近來捕役名爲拿賊而實聚賊者比比然也當賊之初犯捕役輒非刑拷掠所竊贓物若不知誤買捕役每任意訛詐且唆使誣扳良懦藉逞魚肉之私欲壑既盈始行送案其黠悍者捕役復陰爲保護預備吳日爪牙久之捕與賊親賊與捕習凡賊所未能之伎倆捕役吏皆有以教之追賊將開釋捕役暗向賊議定每月給錢若干謂之兌規矩以後無論如何偷竊永不拘拿故桁楊一脫晝夜肆行而賊從此愈明目張膽毫無顧忌矣夫賊之畏役甚於畏官捕役既明明包庇賊又何憚而不恣其攘奪哉亦有迫於饑寒不必甘心爲匪一經懲創亟思湔洗自新而捕役之逼取規矩如故力無以應只得仍蹈前轍雖欲不爲賊而不能也在被竊之家捕役率差勘驗入門便索差飯臨行復索差價其後並索賄覓眼縫竄事主所失已多而賊賊迄無所獲至於勒索不遂反將事主妄行拘押則又作奸竊法之尤者以故民間被竊隱忍而不肯呈報者往往有之況慣賊無不與捕役潛通聲氣偶遇嚴明州縣一聞緝拿卽送信令其遠颺若州縣不肖者大半徇庇盡役明知故縱此

所以盜賊熾而小民之受害無窮也臣生長鄉隅深悉此弊一邑如是他邑可知一省如是他省可知擬請飭下各省督撫轉飭各州縣嚴禁捕役聚賭惡習庶盜源可以漸戢閭閻亦得稍安矣又奏州縣爲親民之官緝捕其要務也近日州縣於緝捕一事多不講求民間報竊或遲至十數日或遲至數十日始飭捕勘驗並有終不勘驗者事主呈催往往反被責押至於搶劫重案又每向事主多方抑勒令其改重爲輕以規避處分玩視民瘼莫此爲甚又何望其除暴安良乎因思州縣於盜犯固有查參例限似竊案亦宜釐定章程擬請飭下各省督撫令各州縣每屆三箇月將所屬報竊若干案並已破未破若干案申報該管上司年終卽以捕緝之勤惰爲州縣之考成勤則記功惰則記過庶能幹者愈以奮勵怠者知所懲而於吏治亦不無裨益上諭御史牟蔭喬奏捕役聚賭殃民請飭嚴禁並請飭定緝捕章程各摺片州縣爲親民之官捕務是其專職若如所奏捕役庇賊需索官費縱令違礙地方官於民間報竊往往延不勘驗並於搶劫重案有避重就輕等情似此縱賊殃民實屬不成事體著各督撫轉飭所屬嚴禁捕役聚賭惡習並明定州縣緝捕章程認真辦理毋得視為具文以靖奸宄而安善良○諭裕祿奎斌奏各屬被水成災懇請撥款賑撫一摺本年湖北夏秋兩汛江河並漲八月以後又復大雨兼旬水勢日熾武昌漢陽黃州安陸德安荊州各府低窪田地多被淹沒襄陽鄖陽宜昌施南地處上游亦因雨水過多同

時被災小民蕩析離居實堪憫惻加恩著於司庫撥銀十萬兩以作賑需准其作正開銷如有不敷仍著體察情形隨時奏明請旨該督等卽確查各屬被災輕重督飭分別妥爲散放務期實惠及民毋任稍有弊混用副朝廷軫念災區至意○諭各直省陳奏事件聲敘地名等項均應全爲前於光緒十三年閏四月間曾經詳細降旨訓飭不准率行減省乃近來奏疏仍復任意減寫如兩廣解餉則解東解西該兩省藩司輒書東藩司西藩司江蘇兩藩司輒書寧藩司蘇藩司之類層見迭出殊屬非是嗣後務當確遵前項諭旨於陳奏事件內書寫地名等項一概不准減文致乖體制將此通諭知之○以豫山爲山西巡撫奎俊爲山西布政使○諭張之洞奏建築堤廉海口礮臺以固防局一摺覽奏均悉各省築臺礮臺等事均應先期咨商海軍衙門議定有案方准興修前經該衙門奏准通飭遵照現廉防務張之洞前於巡視海口摺內奏明興辦惟係統陳大概情形並未將築臺若干礮臺若干先行咨商海軍衙門籌定請旨現在閱時已久始將礮臺築臺各節一一陳奏均係動用鉅款率行定議殊屬不合張之洞著傳旨申飭所奏瓊廉等處現辦各事宜均著該衙門議奏○辛卯諭各直省雨水情形及糧價數目爲年穀豐歉賦課贏絀所關是以向來按月奏聞以資稽核朕躬覽焉幾無日不以國計民生爲念每覽各省奏報無不盡心體察得以隨時酌盈劑虛是雨水糧價之奏關繫實爲至要近來各該督撫均係分月陳奏間有奏

報稍遲者大抵皆距京較遠省分乃直隸五月分糧價直至九月始行奏到實與新疆相同其六月分糧價本月初始行奏到實屬遲延並查該督上年十月將五六兩月糧價並案陳報亦屬非是嗣後務當循照向章本月雨水糧價於次月入奏不得併月奏聞其本年七八九三月分雨水糧價並著迅速奏報毋得視為具文○諭李鴻章奏查明開州等州縣災歉情形分別蠲緩糧賦一摺直隸開州東明長垣三州縣濱臨黃河村莊本年秋禾被水災歉若將應徵糧賦照常徵收民力實有未逮加恩著照所請該督卽刊刻謄黃編行曉諭務使實惠均沾毋任吏胥舞弊用副軫念民艱至意○諭前因吉林兵屯稅務各局辦理均有未協諭令長順查奏茲據查明覆奏此案和龍等商務局卡各員據長順詳查確有私弊自應分別予以懲處參將方朝挪移款項糜餉玩公著以都司降補知縣秦煥鑒知事奚鳳輝背章徇私事多廢弛均著卽行革職佐領額拉德科位置私人舞文作弊著以防禦降補以示懲儆○額爾慶額奏奴才前准伊犁將軍色楞額咨開轉准上駟院咨本院恭備 皇上乘用御馬向由伊犁將軍參贊大臣領隊大臣等每年進呈正備貢馬交納本院預備試馬王大臣等歷試妥協恭備 上乘歷經遵案有年查近來僅止伊犁將軍呈進貢馬八匹其伊犁參贊大臣現經改爲副都統及領隊大臣均有選馬進呈之責因何近年不進咨行伊犁將軍衙門查明參贊大臣改爲副都統及領隊大臣由何年月因何未能呈進

之處速行咨覆本院以憑辦理等因咨行知照前來奴才查塔爾巴哈臺自遭匪變亂歷任參贊大臣
皆未呈進因前經營勇潰變案卷率多遺失究由何年奏請停止實屬無從查悉惟塔城兵燹之後蒙哈
各游牧元氣未復奴才到任後多方購覓實無良馬堪備 上乘相應籲懇 天恩俯念邊地瘠苦請限
至光緒十七年起再行按年呈進之處出自逾格 鴻施下所司知之○以徐文達為福建按察使○賞
給通州粥廠米八百石○壬辰陳絲奏 臣於光緒十三年十月間承准總理衙門電信欽奉 諭旨飭
採辦貢屯陸續解京等因遵即採購野屯四十兩解送內務府呈進仍飭徽州府知府春岫署歙縣知縣
吳以敬接辦蒐採在案茲據該府縣稟稱僱募居近黃山熟諳採藥之人入山尋挖並訪聞藏屯之家隨
時收買邀同知醫紳士敬謹選擇共得天生野屯三十六兩呈送前來 臣親加查驗係屬真正野屯可稱
上品謹裝盛兩匣專弁齎送內務府查收呈進下所司知之○諭各省藩臬兩司皆由朝廷特簡例准專
摺奏事恭讀乾隆十三年 高宗純皇帝諭旨兩司為督撫之佐督撫果能公忠自矢毫無欺隱固不待
旁人糾察若使稍有未協兩司據實入告則督撫亦有所防檢而不敢恣又三十年 諭旨藩臬兩司俱
有奏事之責乃若心存顧忌不敢自發一言倘督撫中或有敗壞執法之事勢必將瞻徇隱忍甘於欺瞞
而不顧所關更復不小又五十八年 諭旨藩臬大員遇督撫有貪婪不法情事即應據實奏 聖訓

煌煌再三申誠用意極爲深遠允宜永遠遵循乃近數十年來各省藩臬除謝恩及奏報到任交卸外絕無陳奏事件殊非朝廷兼聽並觀之意朕總覽萬幾惟期明目達聰以裨庶政嗣後各該藩臬如遇督撫有營私仇法驕恣乖張貽誤國計民生等重情卽行據實指款參奏若有必應整頓革除之事該督撫狃於私見沮格不行或必不可辦之事而督撫任性妄爲不聽勸阻均著具摺密陳候旨定奪不得因仍故習緘默不言至該省一切應由督撫主政事務仍當恪遵定制和衷商辦倘因有此旨故意與督撫爲難遇事紛爭挾私攻訐則自干重咎難逃朝廷洞鑒也將此通諭知之○陳彝奏宣講 聖諭律條載在欽頒州縣事宜所以啟牖愚蒙潛消愚氣意至深遠非徒奉行故事已也皖北風氣强悍命盜案件之多甲於他省近年黃水入淮民情困苦仰賴 皇仁浩蕩多方賑恤鄒工既已合龍而慶史生臣竊以爲民勞則思安此正可與爲善之機也查有江蘇廬生張黼原名景文附生姜森向在鄉里任宣講之事詞意剴切傾聽者多臣邀其來皖由省歷穎州鳳陽泗州三府州屬隨處舉行以爲提倡沿途費用由臣資給不令地方官應付一文一切公事亦概不與聞或者災後窮黎於還定安集之餘幡然悔悟於民俗不無裨益至宣講例以朔望蓋古人月吉講法之遺意今該生等周歷各處勢難拘以定期而鄉曲之間講生無幾若必定以朔望則輟講之地轉多似不若朔望之外加期宣講俾蚩蚩之氓多聞一日之警言卽培

植一日之營氣除飭地方官延訪端正紳士實力舉行外擬察看情形如有小效再行會同學臣議定章程以仰副 朝廷教思無窮之至意報聞○諭軍機大臣等前有人奏察哈爾都統托倫布查辦鄂尼巴圖等控案勒令出具誣捏甘結並有非刑斃命等情當經諭令李鴻章確查具奏現據托倫布奏訊明牛羊羣控案分別奏參一摺所稱查明各節是否屬實並所擬鄂尼巴圖等罪名處分是否允協著李鴻章一併詳晰查明據實具奏原摺著鈔給閱看○甲午諭前據張之洞奏廣東軍需善後報銷請免造冊冊當諭令該部議奏茲據戶部遵旨覆奏向來核查報銷均須造具細冊方能按照舊章詳細勾稽分別准駁若僅開單具報無從核算前經該部奏明光緒九年以後軍需等款概令造冊報銷不准再有開單奏報各省均經遵照辦理乃張之洞輒將九年以後軍需善後各款率請開單具報不特與戶部奏案各省辦法不齊且事止一省時僅數年按籍可稽何難詳細造報國家度支所入經筵皆關帑項豈容祇圖簡便不顧定章任意陳請至所稱冊籍如山徒使堂司各官不能閱身祇供書吏刁難之具尤不成語該部詳更果有藉端徇情事張之洞即應指出其人以便嚴行究辦何得藉案開繁多冀免造冊殊屬非是所有九年至十四年收支各案仍著督飭局員迅速造具細冊報部核銷毋得稍有含混所請開單奏報之處著不准行○諭松駿奏查明下游各屬被災情形提款備賑一摺浙江杭州嘉興湖州等府屬田禾

被水淹沒災情甚重饑民待哺嗷嗷爲日方長亟須寬籌賑撫該撫請於藩庫提銀十二萬兩運庫提銀三萬兩作爲冬春查賑之需卽著照所請行該撫務當飭屬確查戶口妥速散放並以工代賑總期實惠及民毋任稍有虛糜至所奏光緒八年因災動用倉穀提銀十萬買補嗣經奏准銀穀並存欸未用竣口前歲將此款在於藩運兩庫陸續提存等語究竟從前奏准銀穀各存若干未用竣之欸若干刻下正在提用何以又稱陸續提存弊竇殊未明晰著松駿據實覆奏○丁酉諭吏部奏遵議處分一摺禮部右侍郎寶昌著照部議降三級調用○戊戌諭戶部奏查明大員長支俸銀俸米照數追繳並歷年承辦之員可否免議等語前任葉爾羌幫辦大臣常繼並未到任後經裁缺所有長支俸銀一千一百三十一兩零俸米折銀三百五十九兩零自應如數追繳著勒限一年全數交清不准任意延宕至歷年該旗造冊單京及該部承辦司員均未詳悉本有應得之咎姑念官非一任事隔多年著加恩免其議處○己亥以景善爲禮部右侍郎○以大寨河工合龍予在事出力人員郎多培等獎敘有差○庚子諭軍務平定以來各直省設立防營朝廷歲糜巨帑不知凡幾各營勇額糧餉必令事事核實方足以鼓勵軍心近聞營中惡習往往虛冒額數尅扣餉項統領營官養尊處優並不時時操練一切廢弛情形幾與從前綠營積弊相等殊堪痛恨著各該將軍督撫將該省現有各營隨時驗查如有前項情弊卽行嚴參治罪至各營駐

紮處所及管帶銜名兵勇數目迭經該部奏准通飭一一咨報各該省視爲具文總未能據實開報著自接到此旨後限於兩月內一律開單詳晰具奏以備稽核如有更換管帶員弁或移紮他處均著隨時奏請將此通諭知之○辛丑諭本月二十六日朕閱看御前行走御前侍衛乾清門行走及侍衛等馬步射戰濂著賞戴三眼花翎溫都蘇誠厚符珍德福桂祥賈瀛載洵均著賞穿黃馬褂扎拉豐阿載瀾均著賞用紫韁博迪蘇著挑在御前行走明安佛佑廣音布著挑御前侍衛卓凌阿瑞啟著賞給頭等侍衛霍綸泰著賞給二等侍衛榮和毓麟伊勒洪阿著賞給三等侍衛長貴著賞給四等侍衛○諭本月二十六日朕閱看御前乾清門行走及侍衛等馬步射除當差番勇弓馬嫻熟之載瀛等業經分別施恩外那蘇圖平時差使懶惰臨期又復告假著罰俸六箇月希朗阿臨期告假著交部議處那彥圖那爾蘇久經告假患病屬實恩全年逾六十現患感冒均著毋庸置議嗣後該王公侍衛等務當練習弓馬勤慎當差毋許怠惰偷安致干咎戾○張曜奏東綱鹽務有引地票地之分連年黃水爲災銷路均極減色所有額引每年減領十萬迭次奏請展緩均奉 旨允准票地鄰近灘場本屬滯岸加以黃水地方凋敝銷鹽益形短絀商人苦累異常前據票綱總散各商聯名稟稱去歲戊子綱官商未領票一萬三千六百餘張已領未運票四萬一千餘張已運未銷鹽七萬五千餘包積壓幾至一年額數此後情形亦可想見商人資本虧耗

無不力盡筋疲請量予變通以維全局等情經臣飭據運司查明詳覆該商等所稱各節委係實在情形請照同治元年及六年兩次奏准成案八成作正二成作餘定限五年再行商請歸復舊制以示體恤等情懇請具奏前來臣覆加查核票地各州縣多在黃河下游迭遭水患銷路不暢係屬實情合無仰懇天恩俯念商情苦累准其援案將額粟十四萬一千一百二十五張自本屆己丑綱爲始八成作正年清年款二成作餘儘銷儘報五年後察看情形再行復額出自 鴻慈得 旨如所請行○諭給事中方汝紹奏海防新捐請飭酌核推廣一摺著該部議奏摺內於應行據寫字樣空格書寫殊屬不合方汝紹著交部議處○張之洞奏臣前欽奉 上諭沙田升科一事正賦攸關豈容奸民蔽匿迭經戶部奏催辦理著該督撫督飭所屬查明已升科若干畝未升科若干畝即將未經升科之沙田迅即確查妥辦等因欽此當卽恭錄欽遵督飭司局籌議辦理近准戶部咨現擬改辦升科誠爲正本清源之計粵省地居濱海沙坦較寬此項退水之田素稱膏沃獲利既重流弊滋多是在妥議章程豫定期限嚴稽匿稅慎選賢員一切事宜果能經理認真自必立有成效況仿照山西鹽甯馬廠成案辦理更有把握萬不至若從前之因難中止務須妥速籌辦勿涉因循等因復經轉行飭辦茲據廣東布政使高崇基會同沙田局司道詳稱粵省沙田以廣州府屬香山爲最多順德新會東莞次之番禺南海又次之潮州府屬海陽揭陽潮陽

澄海等縣爲數有限自嘉慶二十三年查辦升科以後所有新沙溢坦斥鹵成熟雖迭經報查清丈飭令照例升科終以未經部覆核定未能入額編徵各業戶坐擁膏腴仍完斥鹵輕則至沙田畝數潮查嘉慶二十三年奏案已查明奏准升科者五千三百餘頃此項名爲額數咸豐年間屯田變價案內除由官長虛稅無人承領者五百餘頃外實則升糧者一千四百餘頃至同治六七年間清丈案內查出溢田繳應升科者五百餘頃光緒七年補升案內查出斥鹵成熟應撥則補升者四千餘頃此各項皆爲新沙此外近來新增溢田自當不少但未經呈報勘丈無從懸擬合計老沙新沙有案可稽者共計一萬一千三百餘頃至同治年間清丈案內奏報沙坦一萬九千餘頃查與司案縣案皆不相符似係舛誤無關收息銀數出入應俟查明致誤之由另行辦理惟查老沙田則皆未請給部照民間但憑單據縣照司照營業其間或有遺失或經典舊影射侵佔啟爭受累均所不免此次擬請除原額民田外無論老沙新沙一律換給部照其每戶田不及一頃者以一戶爲一照若一戶過一頃者以一頃爲一照如數頃數十頃之外尙有尾畝數十畝亦儘數填給一照以便買賣分析老沙無庸再丈按冊核給新沙清丈明確立時填給嗣後民間買賣過割以此爲憑仍詳加查勘分別上則中則升科起徵永遠免其攤派籌捐此次繳應定則俱載籌章酌量從寬庶國課漸充民情亦順現已詳察輿情酌擬章程一面遵員設局延商公正大紳

出示開辦惟必須頒發戶部空白執照隨時填給方期鼓舞其照式由粵省酌擬咨部核定刊發詳請具奏前來○查廣東查辦沙田之案自道光二十四年以來已不下五六次或溢坦歸屯或屯田變價或斥鹵補升或呈報溢坦或海防沙捐查勘累年籌捐多次惟始終未領部照未編賦額以故清如不清丈如不丈不能取信於民由來已久此次遵旨清丈升科應頒部照隨丈隨給使各沙戶曉然於此舉實爲便民安業一勞永逸之計執有此紙以後或買或管業永恩訟爭更無派累庶可踴躍趨公一律澄清查臣前在山西巡撫任內勘辦豐甯官莊馬廠卽係奏准頒發空白部照隨丈隨給一時租戶耕氓無不爭先引勘惟恐清丈委員到來之晚事理相同民情可見竊聞直隸奉天等處丈勘荒地辦法略同此次部咨既准仿照山西豐甯馬廠成案催令速辦相應援案奏請卽委員赴部領辦此項部照回粵以期妥速合無仰懇天恩勅部迅速頒發空白沙田執照數萬張交委員領回俾得及早勘辦一俟辦有成數隨時咨報實於清賦便民大有裨益下戶部知之

十一月丁未諭御史周天霖奏府經歷縣丞等官選補輪次遲滯請設法疏通並屬生請准捐免食餼年限各摺片著該部議奏○諭本格奏假期屆滿病仍未痊請開去差使並請停俸一摺本格著再賞假兩月毋庸開去差使○諭王文韶奏起程赴滇酌帶湖南撫標親兵二百名隨行以壯聲威而資差遣等語

現在雲南並無軍務沿途地方靜謐該督赴任何須帶勇隨行且該省現存勇營足數調度豈必隨帶親軍方足以資差遣卞寶第前帶弁勇赴閩係因閩省督標親軍懸額待補奏明調補缺額於餉銀並無加增是以准其帶往至領省兵勇近日甫據譚鈞培奏准減撤汰弱留強是該省正在裁兵節餉該督輒帶衛隊多名並請照湘軍給餉增糜費殊屬不合所有親軍二百名著卽派弁管帶回湘歸伍不准帶赴雲南○戊申張之洞奏粵省沙田向爲豪紳利藪每一沙一圍之中必舉有力者爲之首事倡立名目藉爲把持計通省沙田以香山東莞順德爲最多而此等風氣亦惟該三縣爲最甚光緒十二年間順德縣大南沙一案何大英等恃勢勒索匪鏡法經臣據實奏參仰蒙 聖明懲辦在案查東莞沙田以萬頃沙一圍爲大宗計田三百數十頃該縣紳士倡立明倫堂名目築圍收租其中有官築屯田該紳等承佃繳租者亦有官屯變價該紳等繳價承領者亦有向爲民業該紳等出價買受者甚至恃勢抑價強買佔耕者亦復有之亦有民間田畝投託該紳等代爲出名使佃戶不敢違抗他人不敢與爭統名之曰明倫堂沙田而其完租並非一致必舉三五劣紳素能魚肉鄉里人所畏懼者管理其事該紳等從中侵蝕無所不爲假一縣學校之名以挾制官長恐喝鄉黨而其中不過三數紳士藉以爲漁利之資此等情形則粵人亦所深悉臣蒞任以來亦有所聞徒以事未發覺姑示含容不爲已甚此萬頃沙田豪紳假名漁利

之實在情形也嗣本年夏間迭據沙田局稟稱東莞明倫堂紳局承種之萬頃沙田園中共計三百餘頃內有田一百三十餘頃乃係官屯變價該紳等承領三十餘年應繳屯價花息二十餘萬兩僅繳過銀三萬兩其餘所欠甚鉅延不繳完稟請嚴催當經臣飭催速繳該紳等置若罔聞其意視官之催迫爲具文以己之延欠爲本分臣因該紳等所欠官項計銀十四萬兩有餘尙有承領博學館生息銀八萬兩又有承佃官田歷年積欠督糧道屯利銀一萬九千餘兩合計共銀二十六萬餘兩一時斷未能繳完徒事追呼難期清繳明倫堂紳局又向爲人所畏忌其田恐無他人敢承查有省城廣雅書院尙有臣籌捐發商生息銀十餘萬兩當經批令該紳等將田一百三十餘頃繳出歸入廣雅書院其所欠之銀十四萬有零卽由廣雅書院代還此項屯田變價本係官田該紳等承領三十餘年收租已屬不少乃至今並未繳價卽論民間買賣田業多年總無交價豈能將田土據爲己物亦只有由田主取回另售他主此時由官收回官田免其繳價由廣雅書院代還既非將其私置田產罰以充公又非勸令捐助辦理可謂和平該紳等初以爲延欠官租屯價官必無可如何聞臣決意澈辦乃與分局委員相商倒填年月分批繳銀四萬兩以爲藉口之計至其餘之十萬餘兩及所欠屯利仍無影響此該紳等延欠租項舞弊朦混之實在情形也臣伏查沙田清丈給照升科係奉諭旨飭辦屢准戶部咨催斷不容稍有延欠至此項屯田本係

官物尤非沙田民業可比當經臣飭委奏調廣西知府石承霖前往會同署東莞縣知縣張璿切實開導
乃該紳視地方官爲無足重輕抗置不面該縣等傳佃繳契該紳等旋令佃戶概行逃匿又復捏造長紅
標貼稱此爲一邑之議舉其勢直不容官爲過問經臣札飭東莞縣知縣將管理明倫堂紳士指名詳參
該紳等始行來省商辦臣因該紳等既來省城飭令沙田局委員署南海縣知縣王存善會同署東莞縣
知縣張璿傳集該紳等勸諭該紳等仍行抗置轉託他紳面見該縣等商辦該縣等令將田一百三十餘
頃繳出該紳等乃云歷年所費築園工本計銀數十萬兩查粵省沙田向章其始撥給佃戶承租議定或
五年或十年承耕而不收租項謂之荒期其田應築之園卽由佃戶出資如需費過鉅係按年出之佃戶
無須費本此等章程通省皆知該紳等承領三十餘年現在已成上熟之田豈有荒期尙未滿限之理亦
何曾出過築園工本不過藉此爲詞意在刁難臣復令東莞縣知縣諭飭該紳僅令收回未經繳價之八
十餘頃其限外倒填年月所繳之四萬兩本應發還亦姑從寬作爲限內所繳不再令繳屯田並令酌給
築園工本銀四萬兩以示體恤又不令易佃卽令明倫堂紳局作爲總佃俾其繳出之外仍可冀沾餘利
似此辦理實屬格外從寬乃該紳等始猶不遵繼則曰云遊辦而又求加築園工本並云官給之築園工
本四萬兩不能將所欠之屯租及承領之博學館生息銀兩扣抵查積年所欠屯利本係應完之項扣除

博學館之項更可免交息銀該紳等不肯扣除其為有意欲延欠兩款銀兩不問可知似此佔耕官田始終違抗實屬大干法紀且該縣區區一紳局已坐享膏腴二百餘頃之厚利而此八十餘頃尚欲全數霸吞不肯撥歸書院使兩省士林稍為沾溉此不惟 國憲難容且亦非人情所有尤可異者該紳署南海縣知縣王存善會同勸諭原因該縣本係沙田局委員又係管理廣雅書院委員並非局外之人於本分公事分應秉公竭力籌辦乃該紳抵縣詰問切實章敢昌言於眾謂臣如奏參諸人臣雖調任湖廣該紳等必入京設法屬人將王存善參劾藉圖報復又託人告知臬司謂必與王存善等暫泯忿意在挾制該紳等之意不過欲蹈何崇光之故智指使言官把持地方政務其視 朝廷綱紀法令有如弁髦實屬狂悖已極現據署東莞縣知縣張璠會同沙田局委員稟覆並查開該紳等銜名前來查有候補直隸州知州黎家松捐納戶部郎中何慶修均屬攪權抗官營私專利大挑教諭郭庚吉職員錢萬選均與黎家松朋比為奸夥分私利遇事把持而黎家松尤為劣跡多端平日最好干預公事相應請 旨將黎家松何慶修郭庚吉錢萬選等四員一併斥革永不敘用開復之禮部祠祭司主事鄧佐槐亦係在局管事惟平日為人尚近謹飭此事雖一同在局與聞尚非主謀應請暫行斥革俟查辦完竣察看能否改過有無阻撓情事再行奏請開復其欠租欠價之沙田八十二頃已飭署東莞縣知縣張璠將該田查封勒令收回

撥作廣雅書院常產另行招佃承租並據東莞在籍刑部主事黃夢呈請認租此項沙田每畝每年願繳租銀五錢已批准該紳承領每年將地租繳縣由縣解送廣雅書院作為常年經費其應繳變價花息銀十萬零八千兩卽由該書院經費項下照數撥交沙田局充餉以清款目至東莞明倫堂所欠屯租一萬九千餘兩仍嚴行勒追如再敢抗延及有霸田不交情事再當從嚴參辦臣查廣東地方公正紳士固多而無知劣紳把持公事漁利抗官罔知法度者亦復不少最為惡習沙田一端尤為利藪聚強兼併病民抗官怒不畏法而又假借名目陰持利權直視官田為己物官租為應行乾沒之款該縣紳士亦多怨恨皆謂側目不平臣辦理此案決不欲稍從刻核迭次從寬而該紳等始終藐玩若不嚴加懲辦實無以清田賦而儆強橫不惟於沙田大局有妨且將謂劣紳漁利結黨抗官為得計於紀綱風氣尤有關繫臣在任一日於地方應辦之事必當竭力舉辦斷不存五日京兆之心稍為遷就 上諭張之洞奏劣紳欠繳屯田變價把持違抗據實奏參一摺廣東東莞縣萬頃沙圍田一百三十餘頃該處紳士承領三十餘年應繳屯價等項銀兩甚鉅疊經嚴催迄未完繳經張之洞確切查覈准將所繳銀兩抵扣外僅令收回未經繳價之八十餘頃撥作廣雅書院常產該紳等仍復抗不遵交實屬把持違抗漁利罔為自應從嚴懲處以儆豪強候選直隸州知州黎家松戶部郎中何慶修教諭郭庚吉職員錢萬選均著一併革職永不

敘用禮部主事鄧佐槐著暫行革職俟查辦完竣後察看有無阻撓情事再行奏明請旨○己酉依克唐阿奏呼蘭巴彥蘇蘇綏化三城地勢西南帶水東枕深山人煙櫛比良莠不齊年來東三省水旱成災流民趨往饑寒交迫草竄叢生因而結黨肆行水陸擾害民不聊生雖有官兵分投剿捕而地方遼闊兼顧難周且帶兵將弁或世祿起家而昧於制敵或少年新進而恒怯無能以致捕務久無起色三年積案尙未奏聞幾至賞罰不行士氣不振今年五月初間奴才抵任即據呼蘭副都統倭克津泰飛咨增兵助剿前來奴才隨即一面咨覆該副都統嚴飭各隊將弁退勇進優實力防剿一面奏派已革副都統二等侍衛古爾洪額爲全軍翼長前往專司督剿以一事權當該翼長未經過防之先疊據副都統倭克津泰及各隊官先後報稱五月十四日至六月二十六日馬賊集黨或百餘名或數十名不等分股搶掠曲家鑪西河沿大荒溝拉三秦安邦河半截河子許家窩棚灣河南沿水陸等處肆虐備極兇殘迭經分軍前往剿捕連開八仗陣斃悍匪四十六名生擒首匪王果湘郭萬山等十五名奪獲馬匹鎗礮等械六十餘件查點我軍陣亡佐領托精額一員甲兵一名受傷甲兵三名雖屢有斬擒而尙未殲靖賊仍時散時聚滋蔓閭閻奴才立飭該翼長吉爾洪額由省挑派佐領甘圖記名總兵根喜等帶領馬隊五十名馳往督率各軍聯絡鄉團合力兜剿嗣據該翼長呈稱自七月十七日到防起至八月二十日止一月之間親督

各軍迭剿搶掠大青山頭二道溝子羅郭橋城子屯馬家窩棚七馬架等處股匪連開大仗屢挫兇鋒陣斃悍賊一百一十五名生擒首匪王振玉王中祈有幅張立險等十九名馬匹鎗礮旗幟二百餘件查點我軍陣亡甲兵一名受傷十餘名該匪大受創傷向呼蘭河北潰竄八月二十六日突有匪首掃北劉二川東德等共率悍黨二百餘名由山裏竄出合夥滋擾上集廠雙河鎮一帶賊勢復張據該翼長呈報賊黨雖多究屬烏合之衆不難聚而殲旆遂將各隊官軍挑弱留強共選精銳弁兵二百名分作三路親督營總勝德記名總兵根島委參領盛全巴爾信布等前往河北合力夾剿奴才復核該翼長迭獲勝仗乘勢進軍雖所帶均屬精壯而兵單賊衆未免後路空虛第恐進退維谷當即咨行呼蘭副都統就近派隊策應以壯軍威又慮匪黨被擊狂奔竄越鄰境並檄行布特哈盟兩根各城嚴加防範勿稍疏懈此股巨匪能否全股撲滅一俟該翼長呈報到日再爲具奏復查呼蘭地方盜賊昔年僅在陸地擄害良庶近則兼在水路劫掠官商卽如六月二十五日佐領托克精額帶隊巡江在於半截河子陡遇賊船三號由下游搶獲礦局運糧委員船上銀物揚帆上竄該佐領在江岸堵擊被賊發礮擊中陣亡賊卽轉舵南竄我軍無船濟渡不能追剿致賊飽颺欲使江道安靖非創設水軍巡緝別無良策至陸地馬賊向恃青黑二山爲遁逃藪兵多則入山藏匿兵少則出山虐民欲使山谷肅清非深入窮搜似無良策第山口繁多

官軍較少不免兵入賊出之慮奴才擬俟翼長吉爾洪額剿捕河北巨匪得手後飭該翼長先行聯絡鄉團擇紮山口堵賊出路然後酌加津貼預備鍋帳車馬載運糧草節屆冬令整隊入山比至山中審察賊匪往來各道酌派官兵隘紮斷賊盤氣俾官軍銳意搜尋內外夾擊以除伏莽而清盜源以仰副 聖主除暴安良之至意所有傷亡官兵均屬踴躍効命臨敵捐軀合無仰懇 天恩勅部分別議卹以示觀感得 旨覽奏均悉所有傷亡官兵著交部分別議卹○諭張之洞奏隨帶親兵前赴湖北等語各省督撫均有額定兵弁足敷差委本不必另立親兵名目近來總督赴任輒復添帶親兵前往既多糜費且與定制不符該督所請添招親兵五十名著不准行其原有之一百名卽著管帶官吳良儒帶回廣東不准隨往湖北經此次訓諭之後各督撫升調赴任倘有再行濫請者定卽與以懲處不貸將此通諭知之○諭張之洞奏調員差遣等語候選道蔡錫勇山西候補道陳占鰲候選知府沈崧齡廣東候補知州凌兆熊候補縣趙鳳昌江蘇補用知縣薛培椿均著發往湖北交張之洞差遣委用○庚戌諭國家設官分職文武並重從前軍務倥傯各營勇丁積功累保有裨至提鎮而仍隸卒徒者文職大員往往視同厮僕當時隨營轉戰習以爲常等威莫辨現在軍務較平各營將弁先應整肅營規習勞耐苦不准講究酬酢虛文惟一切體制亦須悉遵定例將向來軍營陋習痛自革除恭讀雍正四年 上諭督撫提鎮相見倘有違

例披執者一經發覺定將僞做諸嫺各人一同治罪又乾隆五十九年 上諭督撫等接見提鎮務須遵
循舊制倍加謹慎提鎮等亦當各知自重不得過爲卑屈以肅官常而昭體制 聖訓垂誡深切著明必
當永遠遵守嗣後各省實缺提鎮以下官員與文職大員交接禮儀往來公賄務遵會典所載一定程式
不得過抗過卑稍違定制其大銜借補小缺各員仍各照借補官階不准攙越當此整軍講武之時各鎮
將果能顧名思義自待不薄各該督撫當仰體朝廷愛惜將領之意優加禮貌倘該將領等因有此有或
轉貽僭踰或不遵調度甚至非分營私干預地方公事卽由該督撫據實參劾亦不能倖邀寬宥也將此
通諭知之○辛亥諭前據御史德薩奏通倉匪徒趕京營謀將旗漢俸米移至通倉開放希圖漁利一摺
當令戶部查奏茲據查明據奏各項俸米向分京倉通倉支領過有應得變通之處該部必須專摺奏明
察有允准後方能辦理不特倉場衙門不能擅專卽戶部亦不能遽行改割豈花戶人等所能干預此項
倉場衙門並未咨部改割倉匪何所施其伎倆至歷屆撥賑之米皆係糧粟並未動用白糧與通倉盈餘
毫無關涉該御史於各倉情形均未深悉懸空臆揣語多隔膜所奏著毋庸議○諭御史何福基奏各省
請調被職人員應分別准駁請飭明定章程等語著吏部議奏○諭御史何福基奏海防捐輸減成宜分
別辦理一摺著該部議奏○以甘肅新餉解清子河南布政使劉瑞麒等獎敘有差○壬子依克唐阿奏

黑龍江省向屆冬令舉行圍獵以資演練俾成勁旅用備一日之需所有官兵應需圍銀一萬四千餘兩
歷經戶部指由山東撥解本年冬圍又已屆期而圍袋銀兩未經部撥本省向無別款可籌擬請仍舊停
止冬圍以俟下年部撥銀到時再行奏請照例辦理得 旨如所請行○癸丑諭戶部奏駁給事中方汝
紹奏海防新捐請變通推廣一摺此次海防新捐一切條款章程均經該部照鄭工例重定嗣據李鴻章
奏請變通捐章選法復經戶部分別准駁奏准通行該給事中所謂道府優定選班及改獎移獎屢限皆
與定章有礙武職報捐業於同治年間奉 旨永遠停止至會試殿試捐免罰科尤屬有礙體制均著毋
庸置議○甲寅諭詹事府左庶子恩溥奏滿洲科道請飭部疏通正途一摺著吏部議奏○乙卯張之洞
奏廣東連山廳徭匪踞五嶺之脊界連粵湘桂三省深山重谷羣徭恃險負固屢作不靖自道光十二年
剿辦以後漸就安戢近二十年其頑悍之徭匪故態復萌每每出巢劫擄焚殺民村亦遂糾眾互相報復
響隙日深滋蔓日廣良民被其擾害不得安居歷年文武均以拘拿購捕空談敷衍了事兵差人等俱無
敢入徭山傳人緝犯者地處山僻距省遙遠地方多不據實稟報省城無憑核辦以致肆無忌憚愈逞兇
殘本年正二月間迭據連州直隸州知州朱璟署連山綏徭廳同知輔良三江協副將宋福慶稟報連山
軍寨火燒等徭匪與梅村上坪村民眾尋釁糾黨至茶園燬火舖尾一帶焚掠斃斃民人迭經派撥兵勇

查拿該獠排愁不畏法恃眾抗拒屢出肆擾該文武會稟請派兵勇查辦前來當經檄飭署南韶連道林賀嗣抽調兵勇三百餘名馳往連山督飭地方文武將歷年民獠擄掠之案澈底查辦安撫良獠嚴緝奸民其稔惡之獠排相機懲辦以消亂萌旋據該道林賀嗣查明自光緒元年迄今民獠積案六十七起獠控者僅止二起餘皆自逞強橫肆行報復其兇惡最著之獠排爲殺人沖打錢沖黃瓜沖三排自來未經懲創而火燒寨新寨耳環沖等處實爲黃瓜沖等排出入門戶該處屢釀巨案此次飭令交兇屢抗不遵當經該道調派兵勇進火燒寨等處圍捕該獠先已逃匿各軍進剿其巢搜獲贓物悍獠數名而籍名之皮道二油里唐三諸兇均在逃未獲殺人沖打錢沖黃瓜沖三排仍負固不服中爐坑上帶源久暗三排仍復抗傳不到親法情形極爲頑悍可惡臣維民獠相攻爲害無所底止必須將獠寨民衆積年兇悍滋事之匪分別拿獲懲辦始足以弭後患而示持平惟獠人負山爲固伺便出擾民人恨之切齒若不先將獠排各匪搜獲懲辦只辦民寨之匪則民人不服然非懾以兵威則獠人斷不能交匪聽命此時若不早辦以後釀成巨患必致重煩兵力復經遴員候補通判鄭敬馨署理綏獠同知就地募土勇五百名隨同林賀嗣籌辦並飭將電綫由英德縣展接至連州以速軍報正在布置之際林賀嗣適以丁憂離粵現廣東道員中無委辦之員茲查有廣西丁憂候補道前南寧府知府何昭然果毅有爲曉暢兵事上年冬間

經前撫臣沈秉成派辦慶遠府土族匪徒黃國經等滋事一案擒渠散脅辦理迅速尤見才識查猪排境接廣西事關兩省前經電商前廣西撫臣高崇基札調該道來東督辦連州猪排事宜所有連州連山兩屬文武及三江協弁兵並歸該道何昭然節制以一事權歸一轡添募親兵一百名馳往連州連山等處體察情形妥爲辦理並調廣西分防平樂府之副將梁効賢率領部勇一營前赴猪排山西面與縣一帶堵遏以資協助現議辦理之法惟在分別良莠宜諭良猪勿得黨庇助惡其不法猪排則分路扼要築卡斷其鹽布木植貿易以圍之焚山開路兵勇步步進紮擇其猪排中腹心之地築碉紮營數月以後該猪必然窮感自當緝獻兇渠一切咸受約束一面嚴飭民寨勒交兇匪將歷年民猪互控割猪之案澈底清釐其往來猪山撲殺滋事之奸民尤須捕獲懲辦以期永息弊端再將築營留勇移官增汛各事宜詳切籌辦以期經久綏安報聞○丙辰諭爲政以安民爲先自軍務大定以來閭閻困敝至今原氣未復邇年各省水患頻仍小民生計日感朕綜攬萬幾勤求治理思與民休息之道首在禁官吏之苛擾近聞各直省州縣差徭極爲繁重每過一事縱役殃民暮夜追呼百般需索里民點書營求賄免其良懦者則備受嚇詐苦累不堪且聞各州縣署內親友家丁所需日食器用及委員過境車輛等件大半取給於民任意折價又或因公下鄉濫帶衙役僕從輒有數十人擾害鄉閭分外勒索一切費用無非派民供應蕭屋窮黎何

以堪此朝廷子惠元元加恩拊循猶恐不及豈能任職不肯牧令縱容差役等暗中賂削假公竊私嗣後
著該督撫府尹等隨時嚴密查察認真禁革如有以上所指諸弊立將該州縣嚴行懲辦不得稍事姑容
經此次訓飭後倘該督撫等並不實心整頓致各州縣仍有藉端科派情事一經發覺定治各該上司以
徇隱之罪懷之○丁巳諭國家綜覈度支必先嚴除冗費從前各省辦理軍務創立支應採辦轉運等局
本屬一時權宜不能視為常例迨軍事戢平又以替後為名凡事之應隸藩司者分設各局名目衆多鹽
務則督銷分設局卡林立大率以候補道員為總辦而會辦隨辦各員其數不可勝數所有轉管之藩運
兩司轉以循例書諾為了事又如清訟保甲捕盜等事本係臬司專責亦皆另設一局授意委員論公事
則推諉轉多輪庫款則虛糜甚鉅至船政機器各局原為當務之急而局用開銷尤屬弊費叢生漫無稽
考若不一律認真整頓何以昭覈實而塞漏卮前於光緒十一年八月二十二日欽奉 諭旨各省設立
各局種種名目開支供應無非瞻徇情面為位置閒員地步飭令大加裁汰定議覆奏仰見 聖慈詰誠
嚴明各省雖經遵議奏明量為裁汰總未能將冗費認真革除近年以來冗員愈多浮費愈甚著各直省
將軍督撫破除情面將所有各局通行查覆或刪減歸併其有必不能裁即將按月經費限定數目不准
任意增添自接奉此旨後勒限三箇月將議定現留各局開單奏報並將各屬經費每月若干咨報戶部

存案該部於每年報銷冊內逐一查對毋得稍有含混理財與用人相輔而行實爲國治之大端各該將軍督撫身膺重寄務當振作精神切實經理不得徂於積習敷衍塞責將此通諭知之○戊午諭前因安徽宿松霍邱等州縣被水成災經陳彝奏請撥款賑撫當卽照所請行本日據沈秉成奏各屬秋禾歉收復經降旨將各災區應徵錢糧漕糧分別緩徵藉紓民力惟念該省沿江之安慶太平池州沿淮之泗洲鳳陽潁州暨寧國廣德等處州屬俱遭水患小民困苦情形朝廷彌深軫念允宜特沛恩施以資接濟加恩著於本年折徵新漕項下賞撥銀三萬兩作爲撫恤之需該撫卽督飭印委各員確查被災戶口核實散放以工代賑總期實惠及民毋任稍有弊混用副軫念民生有加無已至意○諭德馨奏江西南贛鎮總兵姚廣武任滿請俟防務稍鬆再行陛見等語該總兵自簡放後曾經國基奏准暫緩入都旋飭赴任未經來京陛見茲屆三年任滿自應以時展覲現在各省冬防係屬地方尋常事件並非緊急防務該撫輒藉詞奏請展緩殊屬不合著不准行姚廣武卽著來京陛見○己未浙江提督歐陽利見以病免○諭前因江蘇各屬猝被水患小民蕩析離居當經飭撥巨款妥籌賑濟嗣據曾國基剛毅奏報已嚴飭各屬趕緊踏勘或酌提倉穀或賞給錢文分別撫恤惟念現在天氣嚴寒災民益形困苦朕軫念民瘼時切憂虞曾國基前在山西查賑極爲周妥著會同剛毅卽將現集賑款分撥賢員迅速散放俾災黎早沾

實惠毋任稍有稽延並將辦理情形隨時馳奏以慰區系○諭御史端良奏本年九月間海運倉開放鑄白旗包衣及步營各米有倉匪勾結花戶偷出米石甚多經該倉拿獲王姓及趙姓假稱馮姓等二名交西城坊看管未聞作何辦理旋即釋放飭究辦等語事關匪徒偷竊食米既經拿獲何以復行釋放著巡視西城御史倉場侍郎稽查海運倉御史一體查明振實覆奏○諭本年浙江被水甚重災區之廣幾徧全省前經特撥巨帑藉資賑濟嗣據嵇駿奏請於濟運兩庫撥銀十五萬兩作為冬春辦賑之需復降旨照所請行並諭令該撫將賑務辦法先行馳奏現尚未據奏到朕軫念民艱無時或釋刻下正在辦理冬賑情形若何著即迅速覆奏以慰區系○庚申長順等奏吉林前因制錢缺少於光緒十三年冬奏設寶吉局鼓鑄另籌四盤質捐賠補追奴才長順抵任後添鑄厘增工料節糜費約計一年四鑄共鑄錢八九萬千所抽四盤質捐尙堪敷衍自本年四月禁止抹兌迄今市面賴此新鑄錢文頗能周轉惟近察各屬情景亦甚覺短少現錢但爾添鑄鼓鑄誠恐緩不濟急奴才等再四思維擬借公款即令往派上海採購軍械銅斤委員就便購換制錢十數萬千一併解回吉林俾得分潤各屬稍蘇民困蓋上海商賈輻輳行使大小銀錢卽少此十數萬制錢不致支絀而吉林驟獲巨款實足以救敝起衰因知各省錢禁均服出境第此間爲根本重地錢法最宜疏通奴才等籌款換錢亦屬因時制宜不得已之舉合無仰懇 天

恩飭下兩江總督轉行上海關道勿事留難皆出自 鴻慈迴格 奴才等一面設法籌款鼓鑄方可源源接濟惟有四盤貨捐每年賠補鑄費而外無甚盈餘現換錢及添鑄賠款皆暫借公項動用應俟將來停鑄時核計所短若干再將四盤貨捐展期抽收以資賠補下戶部議奏○辛酉剛毅奏准戶部咨奏派江蘇省製辦三綾布八萬疋油墩布三萬疋至年額應解三綾布五千疋自光緒四年起欠解十有餘年共計六萬疋現今先辦二萬疋應將派辦各布一併限於年內解庫以供支放等因奉 旨依議欽此移咨到前護撫臣黃彭年業經轉行遵辦去後茲據蘇州布政使黃彭年詳稱本屆奉派三綾等布原應遵限辦解無如爲數既鉅而司庫款項一時驟難籌撥且查三綾布產於浙江杭嘉二府油墩布產於松江嘉興等處均非隨地皆有其五色三綾布亦須揀購花紗擇匠定織分別漂染承辦各項布疋向係資成行莊派人就地設局購織發織近因機戶稀少工價昂貴轉瞬冬令織匠星散即使趕緊招集繼繼年內亦難依限全數辦解擬請查照成案分作兩批辦解清楚本年先辦三綾布四萬疋油墩布一萬五千疋額解光緒四五兩年三綾布一萬疋作爲頭批起解其餘三綾布四萬疋油墩布一萬五千疋額解光緒六七年三綾布一萬疋於明年採辦起解作爲二批似此分年勻辦庶幾工料可以次第經營亦不致竭蹶等情詳請具奏前來臣覆查此次奉部奏派三綾等布共有十三萬疋一時織辦不及價腳需款甚

鉅庫款籌撥非易均屬實情所請分作兩批辦運解清係爲繼辦應手籌款稍舒起見合無仰懇 天恩俯准展限分批運解俾免迫促誤公下戶部知之○諭前據御史周天霖奏參察哈爾都統托倫布審理牧羣一案諸多謬妄旋據托倫布奏訊明牧羣控案分別奏參先後諭令李鴻章詳晰查明據實具奏茲據李鴻章覆奏此案已革主事文鑑該都統並無多方慰留置買田產實據案內應訊人證病故二人查無刑訊情事卽著毋庸議總管圖普新巴雅爾此案內誣控之員原告鄂尼巴圖巴特瑪桑窄撤任各缺委署之員均係該總管姻戚子弟該都統徇庇劣員已可概見其查訊控案摺內前後詞意種種自相矛盾信任佐領廣吉圖挾私播弄株連原告坐誣者至六十餘人之多該都統於滿蒙漢情形不甚通曉致被屬員欺蒙實屬有負委任托倫布著開缺來京當差佐領廣吉圖顯倒是非奉文洩忿實屬謬妄著卽行革職牛羊羣總管圖普新巴雅爾固山達喇什巴拉攏瑪嘉巴咱爾護軍校薩炳此四員雖無爲該都統結納倚仗確據惟委署各缺顯涉朋比不知違嫌均著交部議處鄂尼巴圖挺身僞訟達米林扎普巴特瑪桑窄色博克普扎隨同京控既據查明所控各節似非全虛業經革職卽著免其科罪托倫布所請分別斥革之護軍校哈勒津等五十六員名雖附和上控而情有可原原奏貢氣株連殊欠平允均無庸議至張家口廳界私墾地畝著李鴻章會同察哈爾都統認真清查其有礙游牧者仍著永遠禁止以杜

紛擾○癸亥諭御史余聯沅奏請飭各衙門堂官進署等語部院大臣分理庶政各有專司自應勤慎趨公豈容稍有懈弛若如該御史所奏近來各衙門堂官恪恭盡職者固不乏人而怠惰偷安者亦復不少甚至數月一入衙署殊非慎重公事之道以後各該堂官務當常川入署督率司員各勤職守力戒玩愒因循積習以期共襄治理朕實有厚望焉○諭御史余聯沅奏湖北水災請飭開倉發賑一摺湖北各屬被水成災前經賞撥司庫銀十萬兩以作賑卹茲據該御史奏稱該省各府州縣辦理積穀本備救荒之用現在饑民待賑孔亟卽著張之洞奎斌通飭所屬迅卽開倉散放務當認真經理以期實惠及民毋得假手吏胥致滋弊竇○甲子直隸提督李長樂卒賜卹如提督軍營積勞病故例戰功事蹟交國史館立傳並准予諡建祠○以鄧紹忠爲湖南提督左寶貴爲廣東高州鎮總兵馮南斌爲浙江提督○乙丑諭前據張之洞奏潮州添募三營歸知府彈壓調遣當交兵部議覆茲據該部奏稱查明潮州鎮標及城守營額設制兵一千九百餘名北勇練兵一千五百名爲數不爲不多果能訓練認真何患不敷調遣等語各省裁勇節餉迭經降旨飭遵該督何得於現存勇丁外遽行添募所請選募潮營之處著不准行惟各營兵勇積習甚深如張之洞所奏或借端生事或呼應不靈自應及時整頓著李瀚章核實稽查力除積弊以資彈壓而靖地方○諭京師步軍之設所以巡查地面緝捕匪徒該衙門果能實力奉行奸宄自無

從匿跡邇來內外城竊盜之案甚多總由巡查不力以致宵小潛蹤此等不肖之徒大半以聚賭吸煙之地爲淵藪並有外來游民暗中勾結甚至兵丁差役養賊分贓遂至匪徒肆無忌憚膽敢持械搶劫夥衆拒捕迭經事主報案地面官僅以查勘懲責真贓首盜擒獲寥寥釐輟重地緝捕廢弛至於此極該衙門所司何事前經諭令切實整頓並申明賞罰以示勸懲隨據遵議章程詳晰覆奏惟立法固期盡善辦理尤貴認真著該衙門等督飭員弁嚴拿匪類根究窩家將賭局煙館一律查禁以清盜源並會同順天府五城御史力辦保甲分段稽查務使奸民無藏身之所地方自然安謐不得僅以黏貼門牌敷衍了事尤不准僭手竊胥致滋紛擾經此次申諭之後倘仍前玩泄復隱定將該衙門堂司各官一併懲處不貸勿謂言之不豫也悞之○諭自來安撫晉良必先誅黜頑梗近年各省軍務雖已一律肅清惟土匪滋事之案仍復層見疊出推原其故土匪以游勇爲黨與游勇以土匪爲窩家並有訟棍蠹胥串勾結不肯兵役包庇分贖是以迄難破獲及因案發覺地方官又復規避處分諱盜爲竊飾重爲輕甚至有事主報案反被責押情事縱惡殃民實堪痛恨若不嚴加整頓何以戢奸宄而杜亂萌著各省將軍督撫通飭所屬嚴緝賊盜訪拿訟棍隨時將明懲辦毋任蠹役貨緣爲奸致使漏網至會匪鹽梟皆係無賴之徒尤應實力查拿嚴行究治務期盡絕根株以免養癰貽患總之地方少一奸民卽少一隱患倘各州縣玩泄因

相並不認真緝捕卽舊據實嚴參毋稍寬縱各營裁撤勇丁著令統帶員弁妥爲資遣並解回原籍不准隨處逗遛以致流而爲匪其各處承墾荒地客民強悍成風多不安分著隨時彈壓撫綏並編保甲責成甲長妥爲鈴束勿使滋生事端以上各節該將軍督撫務當飭屬實力奉行毋得虛應故事用副朝廷除莠安良至意將此通諭知之○升泰奏駐防藏兵丁自來由藏登募補歷經辦理有年嗣於光緒元年前幫辦大臣希凱以近來募補太多曾經奏明停募專由內地綠營派人換防以杜勾串藏番洩漏公事等弊惟通事及譯書仍在藏內招募查近來內地換防兵丁其強健可用者固亦有人然每每由原營來藏在途逗遛累月經年不能到防更有在原營當差怠玩聚爲該管官所厭惡及鞭笞之人始行派藏或有由藏核換回營者又復更名前來非疲弱狡猾卽惡習甚深甚少誠樸可靠之人奴才上年到藏查看西藏及各營漢民頗有精壯且生長此地能耐勞苦言語亦通但能用之得宜實較內地兵丁尤爲得力去秋今春因邊事孔急不能懸額久待奴才酌量募補數十人均能奮勉當差惟與原來奏案稍有未合當此邊務用人之時自應變通辦理擬請以後藏登漢民准由本營糧務擇其樸誠可靠者送營選取餘丁遇有兵額遺出准其充登防兵丁仍卽准於原額之內酌補三成以示限制其餘七成仍責成原營將備務派樸實強健之丁以資差操不准以疲弱及制經核換之丁濫竿充數似此量爲變通以示限制

庶幾藏防兵既不至外重內輕亦不至懸額過多有誤邊事下兵部知之○丙寅諭前據御史端夏奏海運倉有倉匪偷出米石各情當諭令巡視西城御史等查奏茲據西城御史富亮等查倉御史文綱倉場侍郎興廉等先後覆奏此次海運倉開放甲米時拿獲偷米之車夫二名當卽懲責尙無倉匪勾通花戶偷米之事復因查倉御史到倉該吏役人數不齊並傳聞有冒領米石等弊將貼書王姓小甲馮姓交西城坊管押訊明係止誤差並無別項弊端亦無趙姓假冒馮姓情事旋卽釋放並已革退端夏所稱倉匪偷米各節自係傳聞之誤卽著毋庸議嗣後各倉開放米石著該御史監督等嚴行查察如有閒雜人等在倉潛跡及有偷竊米石各情卽著嚴拿懲辦毋稍寬縱○丁卯以奎斌爲察哈爾都統○以葉志超爲直隸提督○戊辰以徐邦道爲直隸正定鎮總兵○諭李鴻章奏查明秋收歉薄請蠲免租銀等語直隸靖海縣境內淀池本年收成歉薄若將應徵租銀照常徵收民力實有未逮加恩著照所請以紓民力餘著照所議辦理○庚午諭馬丕瑤奏臚舉賢才請旨優獎一摺據稱廣西在籍紳士掌教秀峯書院編修曹馴經明行修不慕榮利山西候補知府楊立旭好學不倦士民矜式均堪嘉尚曹馴著賞五品卿銜楊立旭著賞給三品頂帶以示獎勵

東華續錄

光緒九十七

臣朱壽朋敬編

臣沈彭年恭校

十二月壬申朔諭本年浙江各府屬被水成災民情異常困苦迭經頒帑撥款廣爲賑撫並諭令該省將應徵錢糧賦課查明分別蠲緩茲據該省有漕各州縣受災過重本年漕白糧米實難徵運現擬請熟徵收下忙錢糧等語加恩著照所請所有杭州嘉興湖州三府應徵本屆漕白糧米卽著全行蠲免以紓民困其應徵地丁一項浙東各屬被災較輕仍著照例熟徵收杭嘉湖三府屬被災極重之區應徵地丁並著一律蠲免其餘田畝各按成熟分數分別酌量徵收該撫務當督飭藩司將應蠲應徵各項核實詳查分晰具奏毋任各該州縣朦混侵漁稍滋弊竇用副朝廷軫念民艱至意○以譚繼洵爲湖北巡撫○癸酉以嵩崑爲安徽按察使潘文駿爲山西按察使○以張岳年爲甘肅布政使○甲戌諭倪文蔚奏沁河漫口合龍請將出力人員獎勵一摺本年七月間河南河內縣沁河北岸漫口數月以來經倪文蔚督飭在工員弁竭力堵築於十一月初四日合龍辦理尙爲妥速惟慶府知府李芳柳前代理河內縣知縣朱升吉均著開復滴頂處分其餘在工出力員弁准其酌保數員毋許冒濫餘著照所議辦理

○諭前據張曜奏請截留本省漕米四萬石以資賑濟當令戶部速議具奏茲據奏稱現在倉存粟米約計明年核放欸尚有贏餘該撫請將應運通倉漕米截留備賑應否如數支給俟旨遵行等語所有山東本年應運通倉漕米四萬石著准其截留備賑該撫卽分撥災區核實散放毋任稍有弊混用副軫念民艱至意○以雙壽爲科布多參贊大臣○李鴻章奏准軍收支數目業經截至光緒十三年十二月底止列爲第十六案報銷於光緒十四年十一月二十七日具奏奉 旨該部知道單併發欽此並經造冊送部接准部覆按冊核銷在案伏查淮軍分駐直隸沿海各口要區並奉天之旅順口大連灣等處計護衛親兵仁盛銘楚護軍親慶馬步水師共四十九營又前由湖北調直武毅二營奏明自十四年正月起改由淮餉支銷仍同水陸各哨棚併護運餉械弁勇統歸淮軍案內造冊彙總請銷今自光緒十四年正月起截至是年十二月底止列爲第十七案所有統領營哨官弁員名勇夫開收總數駐防處所先經造冊分咨軍機處暨戶兵工部備查又將支給正雜欸項增裁數目遵照新章每三個月開報一次咨送各部查核其淮軍馬步水師各營並隨營辦事支應等差文武官弁親兵勇夫薪費口糧例補馬匹柴薪車價駝騾喂養郵費水陸轉運價腳夫工採辦製造用款油船船隻經費正雜各項均循前案楚軍營制與奏定章程准銷例案分別截清起止概按湘平折實庫平接續造報飭據淮軍報銷局司道逐欸清釐查核

計補管銀八十五萬二千三百七兩有奇新收銀二百四十二萬六千九百八十二兩三錢有奇登除及
附銷銀四十一萬九千一百九十兩有奇開除正雜等項遵照部議酌定軍需報銷章程各歸各部核銷
計應歸戶部核銷銀一百八十二萬五千八十九兩九錢有奇應歸兵部核銷銀三萬七百十二兩八錢
有奇應歸工部核銷銀七萬一千一百十八兩有奇統共請銷銀一百九十二萬六千九百二十兩九錢
有奇應截存銀九十三萬三千一百七十八兩五錢有奇已接支光緒十五年正月以後准軍馬步水師
營哨正雜餉項並購製中外軍火器械工價預儲軍米等項動放無存歸於後案仍管項下滾接造報等
情具詳請奏前來臣查准軍各營分駐直隸天津大沽北塘蘆臺至山海關沿海一帶並奉天之旅順大
連灣各海口修築新式礮臺擇要扼守仿照西洋兵法練習後膛鎗礮水雷魚雷各用法講求制勝權宜
內衛京畿門戶外控藩屬鄰邦俾北洋海疆千餘里有事得資援應尙稱緩急可恃餉項乃計口授食
之需關繫至重歷屆報銷案內截存銀兩皆係設法節縮並將月餉酌量緩欠原以近畿海防重大軍情
瞬息無定不得不稍留餘地藉備急需現計欠餉至一百六十萬五千七百五十餘兩若將截存銀兩儘
數抵補不敷已巨況次年各軍食米須先期發價赴南省購運方不致臨時缺誤向在截存項下酌撥近
因各省關額解准餉逐漸短少往往收不敷支竭蹶情形日甚一日遂至截存銀兩動放無存惟有隨時

詳催各省關實力籌解莫免遇事束手所有造報十四年正雜款項均係循照歷屆准銷成案撥節支費實用實銷並無絲毫浮冒下所司知之○乙亥定安撫祿奏邊外游民佔墾地畝與朝鮮僅止一江之隔當經奏明循照舊章按四季派員出邊統巡夏秋二季與朝鮮國地方官公會哨稽查等因在案本年委派濠州城守尉英起作爲秋季統巡前往巡查並照章程咨行 盛京禮部先期知照朝鮮國王飭令地方官會哨去後茲據該員詳稱馳抵邊外巡查八月二十日與朝鮮官全龍九公同會哨該使臣親遞邊境肅靜印結一紙由該城守尉呈遞前來除存查外奴才等復嚴飭冬季統巡之員認真稽查以肅邊境報聞○丁丑諭兵部奏各省有馬驛站奏銷久有例限開單請旨飭催一摺有馬驛站奏銷關係錢糧出入例限甚嚴各省歷年應行題奏之案積壓甚多前經降旨嚴催仍未一律遵辦實屬任意遲延茲據兵部開單奏催著各該督撫於接奉此旨後勒限六箇月嚴飭所屬將積壓歷年有馬驛站奏銷趕緊造冊具題以清案牘其光緒十四年末經造報各案卽依限造送毋稍遲延嗣後各該督撫倘仍延不造報卽由該部隨時奏參以儆玩泄○諭兵部奏請飭催各省造報兵馬數目開單呈覽一摺各省兵馬數目例應於每年十月具題造冊報部該部於年中彙題以備考核前於光緒七年七月間降旨嚴催現經該部查明奏稱除江蘇湖北浙江安徽標依限具題外四川江西甘肅廣西湖南山西廣東福建河南山

東粵南貴州等省雖據陸續咨報並未具題陝西於光緒十一年奏報一次亦未造冊直隸省自咸豐六年至今迄未造報實屬不成事體著各省督撫迅將本年兵馬數目限三月一律造冊具題如再遲延卽著該部奏參將該督撫從嚴議處以儆玩愒其歷年未報各案並著分年查補以清積弊○諭裕祿奏各屬被災來春青黃不接應請籌款接濟一摺本年湖北武昌各府屬田地被災甚重民情困苦前經賞撥銀十萬兩以作賑需現該督等體恤地方情形來春青黃不接民食維艱自行預籌接濟加恩於該省司庫內提銀五萬兩由該督撫分別備賑務須實惠及民毋任稍有弊混用副軫念災區有加無已至意○劉銘傳奏臺灣設驛站五十處辦理廢弛文報往往遲延貽誤經旨飭司道量加整頓將原設五處各站駁實裁減並於旁通暨新設各縣分添旁站仍不過原設站數所有原用站夫一律撤去由各營汛分撥兵丁酌給津貼責令傳遞各站另備書識專司站務仿照外洋郵政辦法委令道員陳鳴志督辦自光緒十四年二月初十日起試辦已過一年南北文報毫無稽遲所在稱便統計一年需用經費約在一萬兩上下比較整防籌章全年需用一萬五六千兩實可撙節銀五六千兩下部知之○賞資善堂米三百石○辛巳諭給事中黃賢奏請飭裁撤局員以免苛擾一摺據稱直隸省以甲科地畝爲名於省城各州縣創設清賦總局濫寄耳目竊維撫輯民間頗形騷動等語各省創立名目設局辦事無非爲位

開具地步甫經降旨嚴飭裁減各州縣地畝清查升科係藩司分內應辦之事如果設立多局另派官紳不獨虛糜經費且恐藉端需索貽害閭閻流弊甚多著李鴻章將所設各局迅速裁撤卽行覆奏仍督率藩司飭令各該州縣將應辦升科地畝認真經理嚴禁劣紳雜役包庇騷擾以裕國課而安民生○壬午曾國荃奏揚州府所屬之南運東西兩壩爲裏下河各州縣田廬民命攸關雖修守多年而工段甚長未能處處俱到兼之前年黃淮並漲直灌下游浪激波衝兩壩受傷壩塌之處不可枚舉從前緩修各工今已悉成至要本年險工疊出有良及不可終日之勢雖蒙朝廷福庇幸獲保全而安不忘危尤宜作未雨之綢繆成金湯之鞏固臣迭飭隄工局司道詳細勘擇萬分緊要必不可緩之工籌款趕築約有數端請爲皇上縷晰陳之一曰開工查汜水汛之子嬰閘涵澫高寶兩邑農田金門較寬上吸全河之溜坐窩兜潯本極喫重年久失修坍塌已甚上年突出奇險暫用土工實堵蓄洩亦不過一時權宜之計非拆卸到底重新修築不足以資捍禦又高郵汛之車邏南關兩耳閘病既相同修宜如式臣已先後撥銀二萬兩飭令採購石料以免臨時周章此兩汛開工之不可緩者也一曰磚工查邵伯臨鎮高郵臨城一帶工程舊制俱用磚砌民房櫺比市肆如林近皆敝裂酥鬆每遇盛漲民房處處窖潮漲水輒赴隄工局籲求修理祇因鉅款難籌兼之逼近鐵牛灣水溜河程一經動修須於隄外攔築越壩有礙行船諸多

練手是以欲作旋輟者屢矣前今兩屆復經汎漲該工損壞愈甚間有倒卸墾動土工者若不亟籌拆卸
隱患滋大經隄工局勘明最要次要合龍共計估修三百數十丈需費較鉅擬分兩年一律辦竣其餘應
修之工亦復不少均擬擇要月新磚伏補完整此各汎磚工之不可緩者也一曰涵洞沿隄舊設涵洞係
爲濟農而設必使過水通達庶於農田有益向來有民捐民辦者有官爲墊款者攤捐既未易收齊籌補
亦難免滋弊今擬查明各涵洞之應修應築者一概動撥公款爲之修整此沿隄涵洞之不可緩者也統
計以上各工約共估銀十九萬餘兩而司局各庫均因入少出多同一支絀無可籌撥幸上年開辦蘇皖
賑捐本省及山西河南湖北等省各紳富踴躍樂輸集成鉅款除陸續撥濟賑需外尙有餘存擬即在前
項賑餘內隨時撥濟成隄工局司道擬節核實支用俟事竣後報部核銷以因隄防而保田賦下部知
之○癸未 上諭 大高殿祈雪○追予故貴州荔波縣知縣蔣鼎穀於死事地方及原籍建祠戰功政
蹟交國史館立傳○張之洞奏查吏之本首在清廉爲政之方貴乎平恕從古末有不恤民而能言治者
亦未有不恤吏而能恤民者廣東仕宦素有惡廉之名其實州縣優缺本屬無多自同治六七兩年裁減
各州縣米羨每年計銀三十餘萬兩進款頓少而司庫派解之捐攤各款道府之節壽陋規各上司衙門
之水禮門包辦差雜費一切如故州縣計無復出若非飭法囑獄卽是虧欠庫款大率大缺則撥累無底

小缺則窮困無聊強點者則以貪墨敗檢名玷紳庸闕者則以虧空獲罪全家流落苟非操行十分耿介罕有能自全者其中豈必盡甘暴棄徒以一有虧累不克自拔爲人才計固甚可憫可惜天上司誅求無厭而責屬員之貪黷虧空是謂無理上下互相挾制互相御職聽其虧帑虐民是謂無政其究仍歸於國計民生交受其害而已臣前在山西巡撫任內奏明將通省陋規全裁改給公費並將各屬攤捐全行裁免籌款抵補各屬稱便光緒十年來粵後即著知此間積弊徒以物力臣力皆有不給且積重已久如非澈底查清亦難輕舉惟有先於省城端其本源示之表率除飭署兩衙門所有餽遺雜費於到任日卽已一律禁絕外司道衙門亦經嚴行戒禁於屬吏之或優或劣隨事示以勸懲自高崇基爲藩司于蔭霖爲臬司相助爲理力懲貪風習爲儉約粵省風氣爲之一變省外屬吏頗不乏聞風觀感者隨於光緒十三年爲瓊州道府籌定公費將陋規一律裁禁上年秋冬間臣再兼撫篆責任較專當飭藩司將各屬公私出入各款逐一詳查踴數月之力始一一呈露茲經臣督同兩司悉心籌議必欲爲廣東州縣永除鉅累廣東吏治清其本源一規禮宜革一捐派宜裁一辦差浮費宜省一例差宜少派一道府公費宜籌發一州縣苦缺宜津貼查陋規一項相沿已久本非道府等所樂爲特以辦公無資不免襲常蹈故謹飭各屬其自然量從寬簡鄙俗者斤斤計較表率難言其名目亦甚猥雜如節壽到任禮季規月費油米柴炭

客籍修金盤查倉庫費秋審費到任水禮過山禮乾修修署門包共十四款或此有彼無或大同小異應卽一律裁革不准別立名目需索取巧其有必不能省之公務供支各款雖難全無應照先時裁減一半又查捐攤一項乃本省需用而不能開銷者是派之府廳州縣此百餘年各省相沿之積習大缺在一千金內外小缺亦在二百金內外屬吏之力既不能堪於是百計宕欠其應解司庫者或始終懸欠任扣費廉或設法掙兌利歸指吏其歷任流攤者久成虛濫徒於交代案內多費筆墨延誤例限計藩司衙門凡十二款曰香蠟差費高錫差費小書工食憲書三成綏撫屬練勇經費稿目口糧餉差盤費清查無著攤款報資塘兵餉不敷火藥價車馬船經費臬司衙門凡三款曰驛傳房紙劄飯食傳供飯食司監加增鹽餌以下各款概行裁免其有向需支發之項約歲需銀二萬餘兩由司局另籌開款動支抵補以後道府廳州縣各員養廉除自行稟請留抵部款外均發現銀不准扣抵至捐解道府衙門各款除向係實解公用者其所解多寡之數各仍其舊凡無名之款或有捐無解之虛款及流攤款目一概全裁亦不准再將新款稟請起攤其學政歲科兩試考棚經費往來夫船向爲州縣藉詞虧累之端除棚規本屬各省通行多年舊章自行循舊辦理此外考棚辦差雜費爲數實繁學臣樊恭煦持廉恤吏深知治體與臣會商酌定一律裁減三成並令司局道府不得將候補人員無故多委例差以省擾累此分別禁革規禮裁免

捐攤核減差費之辦法也規禮既裁各府道中如科糧道南韶連道廣州肇慶潮州廉州等府或向有奏
定公費或向有關稅盈餘支用尚充其餘道府各缺減成廉俸於辦公實有不敷必應籌給公費學政按
試各屬隨棚募丁吏役人數較多並爲隨棚人役別籌差津貼皆係所給之數稍贏於所裁之數其承
辦考試各州縣暨最爲瘠苦之鎮平平連感恩昌化四縣亦酌加津貼以資辦公而免藉口計抵攤公費
差費津貼四項通年共需銀七萬七千餘兩卽於誠信敬忠兩商人捐款項下動支此係由外新籌之款
與司局各正款無涉以之爲恤吏戒貪之用似屬相宜此籌給公費之辦法也似此分別釐正積弊一清
道府既充然有餘亦脫然無累有餘則可以正色率下無累則可以勉爲循良倘道府仍取巧於下牧令
仍轉割於民以及侵挪錢糧甘受賄賂兩司不難詳參道府不難稟揭從嚴懲處亦復何辭從此官無重
累民無虐政庫無虧缺廣東吏治民生庶幾可日臻上理矣據廣東布政使游智開按察使王之春會同
督後局司道核議詳請具奏前來除通飭各屬永遠遵守外理合恭摺奏明立案下所司知之○以何樞
爲湖南布政使德壽爲四川按察使○甲申諭吏部奏道員施補華前保知府未經聲明開復同知原案
請將續保各案撤銷等語補用道施補華前經張曜奏准免繳捐復銀兩其前保知府時漏敘開復原案
復經張曜於月前具奏聲明茲該部亦稱並非該員朦混且歷次褒獎該部均經核准今忽由調取引見

時比照勞績人員到部與原保清單不符例將所得官階班次盡行撤銷辦法殊未允協施補華歷保知府道員及加銜頂戴均著毋庸撤銷卽由該部帶領引見劉錦棠張曜應得卹優處分著准其抵銷○吏部奏內閣鈔出福建道監察御史何福堃片奏近年外省因差遣庸人往往奏調被議之員在督撫各舉所知自必因公起見第該員一經奏調無不旋邀開復並有獎敘微勞較原官更加超擢者徑途便捷易啟賡緣奔競之風夫獲咎有公私之不同由公罪譴斥者其人或尙在可原之例若緣貪酷被劾劣跡顯然豈可因其小有才能再玷仕版此後各督撫請調被議人員何項應准何項應駁應請 飭下吏部明定章程俾各遵守以杜僥倖而肅官方謹奏光緒十五年十一月初九日奉 上諭御史何福堃奏各省請調被議人員應分別准駁請飭明定章程等語著吏部議奏欽此欽遵到部恭查同治元年十一月十三日奉 上諭詹事府左中允錢寶廉請飭大臣督撫不得以降革獲罪之員舉行請留請調等語朝廷賞罰兼施凡係降革獲罪人員必其咎有應得始予罷斥近來緣事久經黜退之員往往謀入軍營希圖奏留奏調爲將來開復起用地步雖其中不盡無可用之人而庸劣各員夤緣巧附者居多一經留調始則謀據要差繼則濫竽薦膺甚至把持要缺無所不爲而實在出力人員轉因之壅蔽擠排亦由自効何以明勸懲而肅官常嗣後各路統兵大員及各直省督撫務當破除情面認真釐剔凡降革獲罪之員必

其人實有才能超眾人地相需者始准隨陳事蹟據奏請仍由該部將該員帶領引見候旨遵行不准僅以差委帶員據拾虛詞率行奏留奏調以儆徇濫而杜謾隨欽此又同治元年十一月二十四日奉
上諭御史呂序程奏休致及永不敘用人員請不准開復捐復等語向來休致人員不准捐復其永不敘用之員劣跡昭著情節尤重是以終身屏棄以示懲儆定例素嚴職階未能寬假乃近來各省於休致人員往往保舉開復並於永不敘用人員亦先請開復永不敘用之案以爲將來保舉地步實屬故違定制殊非朝廷澄敘官方之意嗣後各省督撫及各路統兵大臣於此二項人員不准濫行保奏亦不准代請捐復如有仍前錮習違制濫保者必將該督撫大臣從嚴懲處並將所保之員查明賄囑情託等弊分別從重治罪以杜鑽營而重吏治欽此又同治四年九月初五日奉 上諭御史王師曾奏稽覈較重人員請不准留營差遣以杜倖進等語所奏不爲無見近年稽覈人員往往在各省軍營逗留差委或以奔競結大吏之知或以矯飾爲起用之計一朝任事故應復萌最足爲人心風俗之害著各直省督撫及各路統兵大臣嗣後遇有各項廢員除因公累誤才具可用者准其留營差委以觀後効俟著有勞績仍准據實保奏外其被參斥革情節較重及軍營債事各員均不准留營効力以肅營制而儆官邪欽此均經恭錄入冊遵辦在案是定例本極嚴明已足以昭遵守毋庸另議章程至該御史原奏內稱被議人員一經

奏調無不旋邀開復並有獎敘微勞較原官更加超擢等語查降革人員奏調差遣無非爲開復地步惟何項降革必須何項勞績方准保奏開復限制甚嚴同治六年臣部奏定章程內有私罪降革加倍半不准捐復十三條凡係加倍半不准捐復人員非軍功勞績不准保奏開復間有以尋常異常勞績奏請開復者均經臣部議駁近來各省軍務一律肅清並無所謂軍功勞績此項人員即經各省奏調均不能旋邀開復亦不能遽保官階惟該御史所奏係爲嚴抑僥倖起見相應申明舊例請 旨飭下各督撫遵照辦理並請 旨飭下各督撫遇有貪酷劣跡及加倍半不准捐復人員不得違例率請開復以符定制而肅官方得 旨如所議行○諭本日引見蔣益澧之子氣襄騎都尉候選通政使司經歷蔣德椿著加恩以主事用○乙酉以鹿傳霖爲陝西巡撫張煦爲湖南巡撫○予故新疆喀什噶爾道袁廷齡照道員軍營立功後積勞病故例從優議卹生前事實交國史館立傳並附祀新疆省城左宗棠祠○丙戌戶部奏暫緩烏里雅蘇臺將軍祥麟等奏烏里雅蘇臺房園租稅拖欠難徵懇 恩飭部蠲免一摺光緒十五年十一月十五日奉 硃批戶部議奏欽此欽遵由軍機處鈔交到部據原奏內稱烏里雅蘇臺徵收房園租稅專備官兵出差行裝等項雜支之用於同治九年兵燹後無租可徵十一年六月間經前任將軍等以街市房園並非官職令將有商民承認房園者照舊徵稅至光緒元年十二月底所徵租銀僅數奏請

城工項下動用自二年正月起租銀經前任將軍額勒和布等奏明仍歸官兵行裝等項雜支之用復自七年以來災荒未轉商民裹足至九十兩年舖房無人承認圖地承種無多計此八年內應徵租稅七千餘兩除陸續交納外共拖欠三千二百二十九兩四錢二分五釐伏思此項民欠均在 皇太后歸政恩旨以前要與所開赦條寬免地丁錢糧無異懇 恩俯念積欠實係在民 飭部豁免不惟稍緩民力而於積年報銷可得早清等語查 臣部例載地方積欠錢糧恭奉 恩旨指彌自某年至某年者其扣彌數數仍以已入奏銷之數為準若未入奏銷者不得統作積欠彌免等語查烏里雅蘇臺房園租銀一項專備該城雜項之用其收支數目同治以前向係歸入該城常年經費案內奏銷八年據前將軍等奏稱檔案俱焚九十兩年又據奏稱兵燹後無租可徵同治十一年至光緒元年雖據奏稱照舊徵租係儘數歸於城工動用並未奏銷光緒二年復據奏稱自是年正月起仍歸雜項之用查該城常年經費自同治十三年以後應造十餘年之奏銷疊經 臣部奏催迄今仍未造送所有原奏內稱自光緒七年以來計八年内共拖欠房園租銀三千二百二十九兩四錢二分五釐該城既未奏銷 臣部無憑嚴辦且此項租銀積欠至數千兩之多閱時至八年之久究竟某年房租短徵若干圖租短徵若干是否商民實欠 臣部亦無從稽覈至稱此項民欠均在 皇太后歸政 恩旨以前要與所開赦條寬免地丁錢糧無異恭查本

年三月十六日欽奉 恩詔內開各直省地丁錢糧著戶部查明實係積欠在民酌議年分豁免其已徵在官者不得藉口民欠侵隱等因係專指地丁錢糧而言今該城積欠係房園租項與 恩詔內開地丁錢糧本有區別即使 推恩格外亦當以造入奏銷之數為準方與定例相符臣等公同商酌該護將軍等所請豁免積欠房園租銀之處未便率准相應請 旨飭下烏里雅蘇臺將軍於此次部文到日迅將自同治十一年起至光緒元年止房園租銀收支數目另案奏銷光緒二年以後收支數目仍照舊歸入常年經費案內分年分款題報查覈所有前項積欠租銀應俟冊造到日再行覈辦並令將同治十三年以後常年經費趕緊接造清冊送部覈銷以清積欠而昭數實得 旨如所議行○丁亥諭依克唐阿文全奏職員朦混領款請旨分別懲處一摺呼倫貝爾佐領成瑞赴省領餉輒敢捏造文件冒領款項協領常明藉公濟私通同舞弊均著卽行革職委筆帖式丹巴於款項不知慎重著一併斥革副管松恆於成瑞等舞弊雖不知情惟稟請給發空白印紙殊屬不合依克唐阿於常明呈稿失於覺察均著交部分別議處呼倫貝爾副都統雙齡於松恆請發空白印紙率行允准亦有不合著一併交部議處以示懲儆○諭前據黑龍江將軍依克唐阿奏邊籌通省荒地所禁招墾有利無弊當交總理海軍事務衙門戶部議奏嗣御史楊晨奏請將山東災民咨送東三省墾荒復經諭令該衙門一併議奏茲據會同妥議分別覆

陳朕詳加披閱所籌各節均屬深中窺要東三省山場荒地係旗丁游牧畋獵之區乾隆嘉慶道光同治年間歷奉 諭旨嚴禁流民開墾深恐有礙旗人生計 聖訓周詳用意極爲闕通省向來封禁之荒地近年以來疊據中外臣工奏請招民認墾均未允行誠以該處荒地一經開墾勢必將牧獵之場漸行侵佔旗丁生計日感流弊不可勝言豈容輕議更張顯違 聖諭所有通省荒地著依克唐阿仍遵光緒十年十三年兩次永遠封禁之旨實力奉行毋任奸民濫入私墾其無礙牧獵之處著該將軍悉心籌度繪圖貼說俟核准後分界旗丁耕種詳定收穫助餉章程以足兵食仍嚴禁流民濫跡及私典盜賣等弊務使土著旗丁日臻饒裕方爲久遠之策嗣後該省無論何處斷不可招人墾荒致滋弊竇該將軍等倘不實力奉行或別滋弊端定卽予以嚴懲決不寬貸楊晨所請將山東災民資送東三省墾荒之處亦著毋庸置議○以山東西紙坊漫口合龍予在工出力人員黃全得等獎敘有差○升泰奏奴才於光緒十五年八月十三日繕具摺片分別密陳並咨劉秉璋摘要電 閣旋據赫政來函請將緊要各款電陳總理各國事務衙門查核奴才又復分款註明由印飛電總署亦在案奴才近日督同委員連次婉喻藏番亟宜靜候切不可聽人惑妄與外國人私相交接設若爲人愚弄貽禍無窮卽日前之事亦因妄動而起該藏番等回稱近日藏中謠傳實係無知僧俗肆意妄言我等辦事番官人等受 大皇帝天恩萬不

敢稍存此心只求垂念藏番無故遭英吉利欺凌今已忍辱遵斷取和猶被其任意抑勒聞藏切齒實難甘心如英人能立約了案駐藏大臣如何分付萬無不遵若仍前反覆我等亦惟有仍照前立誓詞盡力拒絕務望鑒原轉奏等情又哲孟雄部長運送衣物六畝來邊云部長不日當回春丕情願棄地不受洋人磨折等語奴才查西金部長如私來春丕英人又必有所藉詞或係英人指使故意挑釁不可不慮當已嚴飭該家屬無論如何設法務阻部長不准來至春丕俾免英人藉以生事否則聞家不准居於藏境該家屬刻已專人力阻諒不至容其前來一面由奴才專足通知赫政告以此意免使英人捏造言詞仍促赫政從速催辦以了前案又奏奴才於八月下旬接赫政來函云在嶺接奉總理各國事務衙門來電指定四條與英國議立一約命赫政知會來營俟接到奴才回覆再行妥商印督迅速派員分劃界址立約遵守等因奴才接到來信立即飭令委員諭知藏番告以不可因小失大上負朝廷旋即將遵照總署指示各節辦理緣由致覆赫政專丁送赴獨齊嶺滿擬九月必有消息不謂印度久無覆文迨九月廿八日忽番官等稟知行營西北納青山有洋人官數員帶領數十人欲來行營請委員轉稟等情奴才竊思必係英人查界之官但未見赫政知會其來亦近習昧旋復迭報英官必欲來營番衆阻攔其勢洶洶噶布倫等是夜來見奴才於四鼓時立即委員馳往彈壓遣散番番保護到營詢其來意自述名姓爲亞

咱阿克納木因游歷迷途展轉至此思欲由仁進岡至納湯較爲捷徑並非因公等語並呈到被阻時所
書信函奴才告以未准知會是以藏番不知仍責其從人預備夫馬以禮遣歸致情赫政囑其轉告印督
勿復仍令若輩越界游行免生他故赫政尙無回信茲據護送赫政赴嶺之差弁千總張文元於十月二
十二日由嶺來營回報在嶺聞得前來游歷英官實係奉委查界而來伊等故意不肯明言以試探藏使
相待伊等如何當日若非委員連夜馳往稍遲數刻待至天明必生枝節英人狡獪乃至如是本年諸如
此類之事不止一次均經督同委員等設法消弭奴才未敢瑣瑣上陳耳刻聞印度已派副督伊姓英官
前來分界因抱病在嶺故未知會又保爾於十月初五日偕同印度派來外務官一員周歷哲界業已折
回前赴印度面見印督須折回獨資備後方可定期會議以上皆由嶺折回差弁面稟情形也奴才必須
接到赫政知會定期信函始能前赴納湯至印兵實已撤盡由嶺至陞吐已無一人祇納湯一營有兵二
百聽候會議惟是藏番守候愈久疑竇愈多邊事以連結爲要奴才惟有極力設法敦促如月內能有準
期應仍靜以待之倘再遷延無定擬即派委委員赴嶺商同赫政相機催辦免致延候過久愈啟番疑又
多變故否則經年株守終非了局也下所司知之○己丑諭吏部奏遵議御史余聯沅條陳科場事宜嚴
定章程本日復據御史牟陸衡奏請嚴查科場積弊各一摺近年以來科場弊竇滋多必應認真整頓以

杜倬進該部所議於點名時責成出結官從旁識認及嚴杜拾替傳遞等弊立法尙爲嚴密全在實力奉行嗣後順天鄉試著責成稽查接談換卷大臣及監臨監試等各省鄉試責成監臨監試等各督場內外執事各官按照該部所定各節切實辦理倘該管官並不嚴查致有各種情弊一經發覺定卽從嚴懲處至錄科取送本有定額著國子監堂官各省學政於錄遺時嚴加考察查明例定人數錄送不准稍涉冒濫平陰裔所奏順天府添設號舍牆垣太低應如何增高插棘之處並著順天府尹親往履勘相機辦理○癸巳諭給事中張元普奏順天鄉試謄錄潦草紅號錯誤以致真才屈抑並飭禁應試士子攜帶石印書籍等語科場爲抡才大典承辦各員宜如何慎重將事嗣後鄉會試年分著責成監臨知貢舉督飭謄錄對讀糊封各官認真辦理詳定核對之法毋得稍有歧誤至士子入場夾帶本干例禁並著各直省督撫及順天府尹屆時申明定例嚴禁懷挾之弊有犯必懲不得視為具文○諭御史余聯沅奏錢糧調緩州縣積弊相沿請飭各督撫認真稽查剴切曉諭等語各省奏請調緩錢糧朝廷無不立沛恩施並諭以刊刻謄黃徧行曉諭立法原爲嚴密若如所奏該地方官於調緩事宜往往捏報村莊假造都圖奉到恩旨先將應徵錢糧一律收完然後宣示國家虛圖鉅款徒飽胥吏之案此等積習深堪痛恨著各省督撫於所屬州縣實力稽查如有前項情弊卽行從嚴懲辦以儆官邪而蘇民困○甲午前正白旗蒙古

副都統特爾慶阿卒賜卹如例○李鴻章奏安州等州縣積淤地方懇 恩減免豁緩糧租允之○德薩奏撥金積弊亟宜整頓請 飭部嚴核支銷欸目下戶部議奏○內申兵部奏查 臣部武職非軍營戰功及異常勞績不得保請 封典而吏部文職保案向無此限制往往文武同案著績凡保請 封典者吏部照章應准 臣部則隨案議駁辦理殊非畫一且 臣部定章異常尋常勞績分別獎嚴其已得有升階升銜各該員弁再有尋常勞績除議敘加級外幾致無可再保似於獎勵之法尙未賅備伏惟 封典一項褒獎逮及其先究與實職有間奮武無異於揆文 教孝卽所以作忠 臣等公同商酌擬請嗣後旗綠武職候補候選大小員弁無論異常尋常勞績一律准保 封典京官准照加級按請封限制保請外官准照加銜保請如有違例奏保奉 旨允准者 臣部仍查明奏請更正 臣部爲文武畫一辦理鼓勵戎行起見如蒙 俞允卽自奉 旨以後到部之案遵照辦理 臣部行文京外都統將軍督撫一體查照得旨如所議行○兵部奏副都統總兵係二品大員除實係軍營戰功卓著之員其餘勞績不准濫保又尋常勞績概不准請加頭品頂戴都統銜提督銜迭經 臣部明定章程於光緒二年二月三月先後奏准在案乃近年各直省保案並非軍營異常勞績仍復以提督總兵請 旨記名簡放經 臣部隨案奏請更正歷辦有案現在軍務肅清有年亟應慎重名器以待殊勳應請申明定章嗣後非軍營卓著戰功凡保以

提督副都統總兵用及請加頭品頂戴都統銜提督銜者卽已經奉 旨允准 臣部仍隨時奏請更正照
章改給譚敘以歸畫一得 旨如所議行○諭戶部奏特參延欠銅本之藩司請交部議處一摺雲南銅
本銀兩前經戶部指撥當諭令江西浙江兩省於前欠項下共解銀四十二萬兩限於年底全數解清乃
該二省奏撥至今報解銀數均尙不及一半實屬任意延玩江西布政使方汝翼浙江布政使許應鏞均
著交部議處仍勒限將欠解銀兩於明年三月內掃數解清倘再遲延卽著該部從嚴參辦○己亥馬丕
瑤奏前撫 臣沈秉成於光緒十五年六月十七日片奏粵西素稱瘠苦與司道等悉心籌畫非教養兼施
不能挽回敝習蓋不潔以詩書之氣則穢悍不馴不戢以農商之利則游惰失業飭各州縣設立義學頒
給弟子規童蒙養正諸書又令興辦露桑於吏治民生大有裨益等語八月二十五日奉到 硃批知道
了欽此欽遵在案 臣於上年春初到 廣西藩司任隨同前撫 臣籌商整頓意見相同當議興辦義學露桑
年餘以來民間漸知向學詞訟亦遂成絲沈秉成於調任安徽行時切勉力底於成茲 臣蒙 恩簡擢貴
任尤重而應求鼓舞振興之法敬爲 皇上陳之一書局宜開也 廣西人文夙盛自漢有陳元士爰以經
術顯著載在史冊代不乏人我 朝文治日新前大學士陳宏謀崛起偏隅所至以正學導化刊書垂訓
採輯籍之精英持諸實用蔚然爲世大儒兵燹後人士流離舊書悉燬謄刊片板無存寒賤遠隔無力每

屆考試不過零星書板或舛錯模糊或泔板翻本難資誦讀且多係時藝講章無以爲稽古培才之助以至流風日下俗尚蕩瀟卽間有刊布各種或行或輟究未能推廣流傳將欲力挽頹風必先廣儲經籍擬在省城開一書局刊六經讀本續刊有關實學諸書江南浙江廣東湖南湖北四川各省書局刊本精博擬請 旨飭下六省將局刊經史各本及陳宏謀五種遺規等籍每種刷寄十部以九部分發梧州柳州南寧太平泗城百色鬱林歸順各府屬州書院妥議章程俾士子獲資借閱平樂近省屢遠近柳思恩近南寧鎮安近歸順可就近往看以一部存省局爲擇刊式樣西省經費維艱書價無款可籌請卽由各省報銷俾窮荒偏隅漢苗模陋得讀所未見書欣然向化各省當亦樂助不吝此區區也臣仍當專函切懇其廣東湖南湖北各書卽由請餉委員就便領回江南浙江四川各書請覓便搭解來桂俟仿刊裝成飭發各府屬州縣照價分售以期散布城鄉務使漸漬涵濡默消悍戾可以清源化俗育德興賢臣遇以爲立教之規莫先於此一機坊宜設也臣嘗閱唐韋丹傳丹爲容州刺史教民耕織力戒惰游其化暢行容州卽今梧州府屬之容縣地宜蠶織伊古已然同治年間前容縣知縣陳師舜勸辦有效現每歲可出絲二萬五六千斤又唐張籍詩有地多生桂無時不養蠶桂林宜蠶亦其明證上年於省城開辦蠶桑今春請領桑本舊日多得絲漸盛若官量橫收買無論絲斤多寡卽出卽售小民徂於近利更將趨之若

舊臣前任山西解州知州創辦蠶桑會設同營機局民以爲便茲擬於省城設一機坊梧州府城設一機坊貴成署桂林府知府黃仁濟署梧州府知府尙志彭壽臨林縣知縣張望陰署蒼梧縣知縣洪昌言妥爲經理該府縣四員均明敏精強辦理可期得力每坊覓僱廣東機匠三名教民學織本地轉相效法日久能自織組綢走通行則利愈溥而民有賴可化游惰而清盜源至柳州府屬界連黔省有青欄樹可育山蠶亦飭柳陽州縣仿黔試辦柳州應否添設機坊俟有成效再行酌核臣愚以爲休養之方莫有於此惟是二者並興籌款不易與司道等再四熟商設法捐辦並擬兩司酌核實詳請奏前來一面飭備工料機張逐漸興舉雖未遽能收效目前但早一日卽有一日之益迨數年後漸能化悍爲馴益爲富庶仰慰宵旰嘉惠邊氓至意亦無負前撫臣惓惓教養之心得旨如所請行○諭本日戶部奏旗民交產請概復舊例一摺宗室及京屯八旗從前所得田產允宜永遠世守查照舊例本不准民人典賣咸豐年間因違例典賣涉訟繁多量爲弛禁茲據該部奏將開禁以來民人置買甚多將來旗產勢必日見其少仍請申明例禁等語所奏甚是已依議行矣旗人戶口日繁亟宜籌久遠之計俾資生計以培元氣而固根本嗣後宗室八旗京屯田產無論老園自置永遠不准賣與民人如有違例私自買賣卽行照例懲辦至從前民置旗地已經升科報部者仍准執業其已投科升稅尙未報部及已經交產有契尙未投稅升

科者均自此次降旨之日起予限六箇月一律升科該都統及地方官務當實力奉行認真分別辦理用副朝廷惠愛旗民至意○庚子給祭 太廟 上親詣行禮○辛丑諭張曜奏力籌山東黃河應辦各工請派大臣來東勘辦一摺山東黃水爲患連年漫溢朝廷時深軫系亟應籌一經久善策庶使沿河居民不至屢遭昏墊張曜蒞任數年於修防事宜尙能切實講求不染習氣茲據奏稱參考前人成法察度地勢河形勉籌應辦工程等語該撫於河工上下游情形業已悉心考證確知利害之所在卽著實心實力將所擬各節督飭在工文武員弁認真經理以專責成所請派員會辦之處著毋庸議該撫受此重任務當不避嫌怨力任其難一切辦法朝廷不爲遙制總以疏通下游挑濬中腹加築北面堤岸爲緊要關鍵需用經費若干核實估計奏明指撥其現擬挑築各工段及前奏韓家坊地方海口情形均著繪圖貼說詳晰奏聞○是年統計出口貨直銀九千六百九十四萬七千八百三十二兩進口貨直銀一萬一千八十八萬四千三百五十五兩相抵虧一千二百九十三萬六千五百二十三兩凡徵貨稅銀二千一百八十二萬三千七百六十二兩

光緒十六年庚寅春正月壬寅朔丑刻 上詣 奉先殿行禮寅刻詣 堂子行禮辰刻詣 慈寧宮行禮御中和殿受禮太和殿受賀○癸卯 上詣 大高殿 壽皇殿行禮○甲辰臨朕於闕二月十五日

恭奉 慈禧端佑康頤昭豫莊誠壽恭欽獻皇太后祇謁 東陵禮成後於二十三日還宮所有應行事
宜著各該衙門照例敬謹預備○乙巳王文韶奏洞庭湖爲東南巨浸納南條白川之水而司其蓄洩急
則受諸衆河徐而還諸大江吞吐有權以能容爲量實爲湖南南北兩省水利之樞紐自荆江南岸藉池潰
口江水橫決而南挾泥沙以趨洞庭沙沈淤積西湖一帶漸以成洲現合龍陽華容安鄉三縣轄境計之
廣袤幾二百里土人名之曰南洲貧窮私墾豪強爭佔蟻聚蜂屯五方雜處納污藏垢訟獄滋多此皆近
年情形臣初次撫湘時尙不至此然此禍患之顯著者也惟洲地愈積愈寬則湖面愈狹容水之區日偏
必致橫溢四出湖北則荆江大堤受其害湖南則濱湖州縣被其災蓋湖中之水既漸變而爲田則湖外
之田將盡變而爲水此必然之勢也臣上年到任後察悉情形以爲湖南之大患無有過於此者明知已
成之洲草不能再事剔除俾復全湖之舊然救敝補偏亦正岌岌不可終日滿擬俟今年秋後水落遴委
講求水利實心任事之員周歷重湖詳加查勘或培官堤以禦汎漲或開支渠以導衆流或將荒溜裁濬
取直以引溜而刷沙總期於辰沅資澧諸江水入湖之口不致壅遏不通激成汎濫之勢並申明定例嚴
禁私築堤垸私墾官荒凡有淤洲苟無礙水道亦祇准官爲招佃不准民間指請升科卽有昔爲湖業今
成陸地之處亦祇准豁除漁課不得藉水佔地仍於南洲地方添設水師一營常川駐紮巡防無令寇盜

因以爲資致蹈宋楊么明陳友諒故轍此皆臣私憂竊計而亟思設法補救者惜恩恩瓜代未及見諸施行惟念臣兩任湖撫湘人安臣之教令有過尋常臣既無德於湘人而並此地方利害所關亦未能及早措置冀弭巨患於方來此尤臣所夙夜疚心而不能自己者也報聞○丙午諭長庚奏請調員差遣等語記名副都統正藍旗護軍參領英裕候選同知嚴金清著卽將軍江蘇巡撫卽飭該二員前赴西藏交長庚差遣委用新疆候補州同錢宗彝著准其留藏差遣○丁未諭本格奏假期屆滿病仍未痊懇開差使並請停俸一摺據親王本格著准其開去一切差使加恩賞食半俸一俟病愈卽行銷假當差○追予故山西布政使方大湜歷官政績交國史館立傳○戊申諭張之洞奏總兵丁憂開缺請旨簡放一摺湖北宜昌鎮總兵羅紹紳蒞任多年熟悉地方情形統帶師船素稱得力著改爲署任以重職守○己酉諭邵友濂代奏劉錦棠瀝陳祖母病狀懇恩開缺終養一摺覽奏情詞悽惻出於至誠朝廷哀憫念惟新疆事務重要該撫久膺邊寄威儀素孚一時實難遽易生手劉錦棠著毋庸開缺再賞假四箇月並加恩賞給伊祖母人參八兩以資頤養該撫其尋求醫藥盡心調治一俟親疾就痊卽行馳赴本任用副朕眷念西陲優加倚任至意○以載敦爲鑲白旗蒙古都統○壬子時享 太廟 上親詣行禮○諭吏部奏遵議處分一摺江西布政使方汝翼應得革任處分浙江布政使許應鑠應得降一級調用處分均著加

恩改爲降二級留任仍著江西浙江巡撫嚴飭各該藩司將欠解銅本銀兩懷遵前旨依限如數解清毋
再延玩干咎○乙卯 上諭 袁先嚴 壽皇殿行禮○己未諭定安等奏查勘 臨陵東西配殿等處
應修工程請擇吉興修一摺著欽天監於本年二三月內選擇吉期先行知照卽著奉天將軍會同工部
侍郎屆期敬謹興修○庚申以高基會爲湖北鄖陽鎮總兵蔣雲龍爲陝西延綏鎮總兵○辛酉祈穀於
上帝○癸亥諭本年朕二旬萬壽慶典宏開莊順皇貴妃母家三代允宜特示推恩以光盛典原任巴
里坤鎮總兵德林原任通判百祿原任筆帖式靈壽均著加恩追贈一品封典靈壽之繼子筆帖式廷忠
著加恩賞給騎都尉世襲罔替用昭隆禮○諭吳大澂奏母病甚重懇恩賞假回籍省視一摺吳大澂著
賞假一箇月准其回籍省視一俟假滿卽行回任河東河道總督著倪文蔚暫行兼署○諭福錕等奏要
差需款請飭兩淮迅撥銀兩一摺兩淮應解步軍統領衙門利銀歷年拖欠至五十九萬餘兩之多本年
閏二月間朕恭奉 慈禧端佑康頤昭豫莊誠壽恭欽獻皇太后祇誕 東陵所有隨扈官兵口分及各
旗營修墊道路需款甚鉅著兩江總督嚴飭兩淮運司卽於前欠利銀內先行籌撥銀四五萬兩批解步
軍統領衙門以應要需倘該運司一時難於籌解卽由該督於藩庫內無論何款迅卽籌墊限二月內如
數解交仍由該運司籌解藩庫歸款勿稍遲延○著翁同龢前准內務府咨辦省准進方物糧香硃砂雄黃

各色茶等項歷經前撫臣及臣遵辦在案茲臣飭令藩司史念祖轉飭桂陽府及龍里各屬照舊採辦運
省逐加點驗敬謹裝配齊全派員履解赴京竊由奏事處呈進下所司知之○諭英廉等奏循例請撥款
項一摺據稱現在恭備要差辦備庫存款不敷請由直隸藩庫撥銀一萬二千兩迅即委解等語著直隸
總督飭司照案撥給以應要需○乙丑諭溥齡等奏請飭撥款項一摺據稱現在恭辦要差承濟庫無款
可籌請由直隸藩庫撥銀一萬五千兩於二月十五日以前委解等語著直隸總督飭司如數撥給以應
要需○丙寅張夢元以病免以廖壽嵩爲福建布政使○丁卯諭本年朕二旬慶辰恩施姓沛因念各省
文武大臣有卓著勳勞久膺綬寄者允宜優加獎敘大學士直隸總督李鴻章兩江總督曾國荃山東巡
撫張曜著該部查明各該大臣子弟具奏候旨施恩福建巡撫劉銘傳著賞給兵部尚書銜甘肅新
疆巡撫劉錦棠著賞給太子太保銜督辦東三省練兵事宜正白旗驍軍都統定安雲南提督馮子材均
著交部從優議敘四川提督宋慶長江水師提督李成謀陝西提督雷正綰廣西提督蘇元春均著賞加
太子少保銜用示朕優賞酬庸優容勳勳至意○以劉煦璣爲浙江按察使○戊辰諭朕二旬萬壽王公
百官仍著穿蟒袍補褂七日○諭本年朕二旬萬壽著毋庸舉行告祭禮所有升殿禮儀著停止○諭本
年朕二旬萬壽各省督撫及將軍提鎮等俱不准奏請來京祝嘏○諭本年秋審朝審情實各犯著停止

句決○諭本年朕二旬慶辰特錫恩綸建盤中外因念推恩之序首重慈親恭親王著於照例甲數外賞
添護軍十五分藍甲二十分紅甲三十分慶郡王奕劻之子載振著賞給頭品頂戴貝勒奕綱著免其值
班貝勒載瀛著賞銀一千兩貝勒載漪之子溥儀載瀾之子溥偉均著賞給頭品頂戴貝勒載澂著賞銀
一千兩載瀾著賞銀五百兩貝子奕謨著賞穿帶膳貂褂溥倫著賞銀五百兩毓麟著繞在乾清門行走
輔國公載澤鎮國公載綱鎮國將軍溥儀載瀾著各賞銀五百兩用示朕篤念宗支數仁錫類至意○欽
奉 慈禧端佑康頤昭豫莊誠壽恭欽獻皇太后懿旨醇親王賢親首著懋建勳猷歷年以來凡遇軍國
重務規畫精詳運籌宏遠而王德望愈隆謙光愈著矢誠矢敬盛美不居深宮嘉悅之餘倍殷寅咨本年
皇帝二旬萬壽宏開慶典允宜特沛殊榮著加恩於照例甲班外賞添護軍十五分藍甲二十分白甲三
十分伊子頭品頂戴載漪著賞給二等鎮國將軍以示優異○諭本年朕二旬慶辰宜綸錫獎闡澤覃敷
內廷王大臣等夙夜在公忠勤懋著自應渥沛殊榮用彰慶典博多勒鳴台親王伯彥訥謨祜著賞穿四
正龍褂親王銜克勤郡王晉祺著賞穿帶膳貂褂禮親王世鐸著交宗人府從優議敘大學士額勒和布
張之萬兵部尚書許庚身刑部尚書孫毓汶均著交部從優議敘科爾沁圖什業圖親王巴寶多爾濟科
爾沁卓哈克圖親王濟克登旺庫爾喀拉沁親王銜都楞郡王旺都特那嚕濟勒均著賞穿帶膳貂褂用

示朕行慶推恩優禮重臣至意○己巳科爾沁多羅貝勒那爾蘇卒卹廕如例並賞銀一千兩治喪○庚午諭伯彥訥謨祜之子貝勒那爾蘇病故昨已降旨賜卹因念伯彥訥謨祜之母年逾五旬驟遭此事未免傷懷伯彥訥謨祜著加恩賞假二十日俾得朝夕侍側該親王其替爲解釋以慰親心用副朕眷注至意○以德銘爲正紅旗蒙古都統○剛毅奏上年蘇屬秋雨成災田禾淹沒仰荷 仁恩浩蕩鉅款下頒並由 臣體察情形將各屬銀米分別懇請 皇上恩施准予蠲減小民歡欣鼓舞莫不挾纓淪肌查蘇州松江太倉等州縣居浙江之下流古稱澤國倘值霪潦便不免泛濫爲災故治三吳者不患旱而患水考古之三江皆在今江蘇境內吳淞一江獨當由甌江東江之中經崑山嘉定青浦上海四縣界入海尤爲浙江之尾閭倘得一經疏通則水勢暢消倘有偏災爲患自然輕減惟此江袤延三百餘里節經前攝臣擇要挑浚苦於工程浩大需費不貲未能畢竣全功俾蘇州松江太倉及浙江之杭州嘉興湖州六府州民普沾利益現值春賑方亟積困未甦更無從籌措鉅款得以大舉浚治擬俟將來冬令水涸之時由 臣察看情形籌備款項再圖大加開挖俾東南之民共享水之利不復被水之害然 臣竊謂講水利者能盡一分之心即可受一分之益不可存畏難苟安之見尤不可不求探原扼要之方查得寶山縣境內蘊藻河一道俗又稱蘊草濱關於劉河吳淞江之中分洩上游之水以入海僅就寶山縣一邑水利言之則蘊

藻澗爲該邑之幹河就通省全局水利言之則蘊藻澗仍爲吳淞之支河自吳淞海口直達嘉定蜿蜒三十餘里向係商賈往來孔道農田宣泄要區年久失修淤者僅通舟楫其淤塞尤甚之處不啻漸成平陸並經嘉定商民於該河迤西唐家橋地方建築大隄名爲攔截渾潮實則壅遏水脈此蘊草澗日就淤淺之實在情形也臣稽諸志嘗詢諸耆老敘謂河身卽形淺涸易於程功河道不甚寬廣亦易於籌款此處挑挖深通然後由支派幹吳淞江卽可逐漸疏濬當此水潦告災之後民間待食方殷擬用以工代賑之法招集民夫趁東作未興趕加開濬並函商督臣調撥狼山鎮總兵唐德慶所部駐紮吳淞防營各勇丁一面抽撥原標防營前往通力合作以冀妥速竣事惟工段頗長勇夫雜處必須部署有方庶免互相延誤其中一切挑浚之法非臣親往指授恐難悉協臣現擬於二月十六日輕裝減從乘坐小舟前赴該處督率營縣詳加查辦飭令興工臣衙門日行公事暫委蘇州藩司代拆代行其緊要事件仍包封送臣工次核辦一俟布置妥協卽行回省下都知之

二月辛未朔諭御史何福堃奏主事保送直隸州知州請飭通融辦理等語著吏部議奏○乙亥諭前因錫綸咨行戶部知內有職員馬瑞麟揭告統帶馬亮等侵吞軍餉呈詞一件當交色楞額等查明具奏嗣據戶部奏參錫綸擅動軍餉各情復諭令一併查奏茲據色楞額魏光燾查明尙無捏造欠款侵吞軍餉

情事且原呈之馬瑞麟查無其人顯係借名捏控卽著與無故牽涉之前署察哈爾領隊大臣德克中布等暨業經革職病故各員均毋庸置議惟已故署伊犁將軍錫綸因挪用正餉經部議駁輒敢捏借商款報部欺目種種不符實屬有心朦蔽大負委任其所報借款曾否撥給軍餉著戶部確切查明據實覆奏

○丁丑祭 先師孔子廟遺恩承行禮○戊寅祭 社 稷壇 上親詣行禮○諭前據御史愛興阿奏參盛京戶部六品官松壽浮收勒索各情當諭令定安查奏茲據查明覆奏此案筆帖式麟超於奉委查災輒敢向各莊頭索取差費並令預備公館實屬貪婪不職據報病迷走失顯係畏罪潛逃麟超著卽行斥革仍著該將軍嚴飭緝拿務獲究辦領催馬世鳳昧於莊頭應交差銀正款已完所欠雜款太多輒復任意勒捐朦官捏稟將莊頭段文舉等斥革情殊可惡馬世鳳宋長秀馮天元均著將領催責革不准仍行充差大品官松壽核造被災分數查係照章辦理雖無浮收情事惟於馬世鳳等朦稟不察虛實輒將該莊頭等呈堂斥革究屬粗疏松壽著交部議處餘著照所議辦理至應徵供應 三陵祭祀蘇麥等項由各莊頭於應交倉糧正款內留存稗子四千餘石折交供應所有於稗折外復有各項折交銀兩雖事非一年官非一任而名目繁多難保無浮冒情弊著盛京戶部侍郎詳加釐定奏明辦理以免擾亂○諭鑾儀衛奏恭備要差請飭催欠款一摺直隸應解鑾儀衛地租銀兩積欠甚鉅本年閏二月朕恭奉 慈

福端佑康頤昭豫莊誠壽恭欽獻皇太后祇謁 東陵該衙門恭備一切差使需款孔亟著李鴻章飭令
藩司無論何款趕緊先提銀二萬兩於二月二十五日以前如數解到以濟要需其本年應徵地租銀兩
仍著照舊陸續批解○己卯以許振祿爲河東河道總督○禮部尙書奎潤卒賜卹如例○祥麟車林多
爾濟奏查烏里雅蘇臺所屬三扎兩盟游牧西南界內有金山翁滾山兩處出有礦砂向設卡倫二十二
處又該兩盟分派官兵駐守梭巡並由該兩盟輪派扎薩克一員經管每年秋季由奴才等派員往查有
無偷挖礦砂情弊據實具奏屢經遵辦在案今屆查勘之期奴才等派筆帖式薩克什納等往查去後旋
據稟稱遵派會同營卡扎薩克巴拉丹查得金山翁滾山二處並無偷挖礦砂情弊及各卡官兵數目亦
各相符隨即按卡取具甘結各一紙應覆核辦前來除將甘結存案備查並檄飭三扎兩盟盟長等轉飭
該管嚴加梭巡勿任疏懶致滋事端外理合陳明報聞○庚辰諭依克唐阿等奏官軍殲除賊巢繪圖呈
覽請將出力員弁獎敘一摺黑龍江呼蘭巴彥蘇蘇綏化三城地方遼闊向爲盜賊淵藪上年十二月間
經依克唐阿等派令翼長吉爾洪額整頓搜山焚燬賊巢二十餘處擒斬積匪一百數十名辦理尙爲迅
速著該將軍等督飭員弁各就駐紮地方嚴密巡緝勿留餘孽在事出力之翼長二等侍衛吉爾洪額著
賞還頭品頂戴以副都統補用其餘出力員弁准其擇尤酌保毋許冒濫○以瑞璋爲江甯布政使福裕

爲江西按察使○以崑岡爲禮部尙書熙敬爲工部尙書○以德福爲鑲白旗滿洲都統以符珍爲鑲藍旗蒙古都統○辛巳諭定安等奏查估 昭陵應修各工請擇吉興修一摺著欽天監於本年二月內選擇吉期先行知照卽著盛京將軍會同工部侍郎屆期敬謹興修○李鴻章奏北洋海軍各船所設新式礮位需用子彈除必須向原廠購買者不計外其有各種長式礮彈天津機器局可自仿造應由該局製辦以備緩急兼省費用惟年操備戰兩項所需礮彈甚夥該局機器車牀不敷應用未能多造現經核議添購大小車牀十六具約估價值水脚保險祇需行平銀一萬九千一百餘兩據該局員詳報前來查本年十月十五日奉 上諭嗣後如有購買機器軍火各項物料均著先行陳請等因茲該局仿造海軍需用各種長式礮彈應添車牀爲必不可少之件應請准其添購製造俾免貽誤下所司知之○壬午諭長順奏欽奉恩綸查明已革職官開單請旨定奪一摺上年特降恩詔革職官員內有事係冤枉才力堪用者准由在京各衙門及各省督撫等查明請旨係屬職典殊非尋常查辦廢員可比降詔以來節經中外大臣准查具奏經朕詳核案由其情有可原者分別起用及交部帶領引見原犯情節較重者奏上時均經批駁於愛惜人才之中仍寓慎重名器之意該大臣自應體朕此意核實詳查豈容稍有冒濫乃該將軍此次單開竟至三十二員之多詳閱所犯情節原委均非冤枉甚至有任意妄爲廢弛旗務營務之重

情長順輔據各城開報及本員呈詞卽爲具奏請一併賞還原職已屬不合至防禦慶祿雲騎尉常順鳳山均係革職留任之員並非離任更何所謂起用是該將軍於恩詔本意全未體會實屬冒昧至另片奏請將前任齊齊哈爾副都統春壽賞還原銜休致吉林鎮黃旗公中佐領春福以原品留營効力各等語查閱原案春壽係剿辦捻匪諱敗爲功特參革職之員案情甚重牛力亦衰春福係因騎射生疏於光緒元年勒令休致並無別項勞績該將軍並爲奏乞恩施似此任意冒濫若各省紛紛效尤尙復成何事體所請並不准行長順並著傳旨申飭○以貴恆爲都察院左都御史○癸未諭怡親王載洵奏病難速痊懇恩開去差使並請停俸一摺載洵著假一箇月毋庸開去差使○甲申以清安爲刑部右侍郎豐烈爲工部右侍郎○乙酉諭張曜奏估計山東黃河工用銀兩繪圖繕單呈覽各摺片均悉山東黃河應辦各工關繫緊要前經諭令張曜核實估計需用銀兩奏明候撥茲據奏稱勘估增修隄埝添建石壩水門挑浚購船並築大隄各工共需銀二百八十八萬五千餘兩除上年已撥之款尙有二十三萬三千餘兩請飭部撥銀二百六十四萬七千餘兩現已定期興工等語卽著戶部查照所請數目迅速籌撥並先由部庫撥銀若干萬兩解赴山東以濟亟需其餘銀兩該部籌定的款分次陸續解往應用朝廷不惜巨帑爲民捍患該撫身膺重寄務將應辦各工督飭在工人員實心實力認真經理總期工歸實用不准絲毫

虛糜正款至各隄埵應否幫寬加高之處著俟本年霜清後察看情形再行奏明辦理○丁亥諭松駿奏
新授福建藩司廖壽豐聲明祖籍應否迴避請旨遵行等語廖壽豐著調補河南布政使福建布政使著
劉瑞祺調補○戊子諭前因錫綸在署伊犁將軍任內補發欠餉捏造商款報部款目種種不符當諭令
戶部將所報借款會否撥給查明覆奏茲據奏稱錫綸所報借款前後自相矛盾是以始終並未撥給等
語錫綸補發吉林黑龍江馬隊欠餉挪用伊犁正餉輒敢捏稱借款希冀彌縫所報之數又復前後不符
雖無侵吞情弊實屬有心朦混已故署伊犁將軍錫綸前得卹典著卽撤銷○己丑張曜奏從前南河總
督管理河工九百餘里東河總督管理河道有工之處五百餘里自因河務重大設立專官自河決銅瓦
廂黃流入山東省蘭儀縣以下直至山陽縣千餘里河流乾涸咸豐十年始裁南河總督而東河總督所
管有工河道僅二百餘里今山東河道綿長九百里從前東河以下係大清河其時岸高河深水行於河
歷三十餘年日淤日高水行於地遂成爲河工要區全恃堤防爲保衛本年臣駐工二百餘日督率修防
日不暇給伏思南河舊道規復無時亟應爲久長之計擬請將曹州所屬濮州河灣起至運河口止河道
二百餘里撥歸東河總督管理與從前東河原管之河道里數相等仰祈 皇上聖裁飭下遵行下游自
東河至利津海口尚有河道七百里臣當竭力修防下部議奏○駐藏大臣升泰與英國總理五印度執

政大臣寶星上議院侯爵蘭士丹在孟加臘城會議藏印條約八款成其文曰茲因 大清國 大皇帝
大英國大君主五印度大后帝寶願固敦兩國睦誼永遠弗替又因近來事故兩國情誼有所不協之處
彼此欲將哲孟雄西藏邊界事宜明定界限用昭久遠是以 大清國 大皇帝大英國大君主擬將此
事訂立條款 特派全權大臣議辦由 大清國 特派駐藏幫辦大臣副都統銜升由大英國特派總
理五印度執政大臣第一等三式各寶星上議院侯爵蘭各將所奉全權便宜行事之 上諭文憑公同
校閱俱屬妥協現經議定約條八款臚列於後 第一款 藏哲之界以自布坦交界之支莫轆山起至
廓爾喀邊界止分哲屬梯斯塔及近山南流諸小河藏屬莫竹及近山北流諸小河分水流之一帶山頂
爲界 第二款 哲孟雄由英國一國保護督理卽爲依認其內政外交均應專由英國一國巡辦該都
長暨官員等除由英國經理准行之事外概不得與無論何國交涉來往 第三款 中英兩國互允以
第一款所定之界限爲准由兩國遵守並使兩邊各無犯越之事 第四款 藏哲通商應如何增益便
利一事容後再議務期彼此均受其益 第五款 哲孟雄界內游牧一事彼此聲明俟查明情形後再
爲議訂 第六款 印藏官員因公交涉如何文移往來一切彼此聲明俟後再商另訂 第七款 自
此條款批准互換之日爲始限以六箇月由中國駐藏大臣英國印度執政大臣各派委員一人將第四

第五第六三款言明隨後議訂各節兼同會商以期妥協 第八款 以上條款既定後應送呈兩國批准隨將條款原本在倫敦互換彼此各執以昭信守○以祥麟爲內閣學士○諭嗣後各衙門呈遞摺件遇有隨摺字樣均著毋庸填寫○己亥 上詣建福宮 聖容前行禮○諭朕於閏二月十五日啟鑾後著派肅親王隆勲大學士恩承協辦大學士尙書福錕徐桐尙書崑岡留京辦事肅親王隆勲恩承徐桐崑岡四人分日輪班在內值宿不值宿者於申刻散值福錕每日進內辦事毋庸值宿午刻先行散值○庚子朝 日於東郊○諭李瀚章等奏請蠲免鎮平縣錢糧銀米一摺廣東鎮平縣地方上年夏間雨水過多被災甚重若將應徵錢糧銀米照常徵收民力實有未逮加恩蠲照所請所有鎮平縣應徵光緒十五年分地丁銀二千九百六十八兩零耗羨銀四百九十七兩零民米七百四十五石零屯米二百一石零均著全行蠲免以紓民力

閏二月甲辰劉秉璋奏查上年馬邊夷匪出巢滋擾因防軍不敷調遣添募先鋒左右兩營旋據夷匪成擒各番懾服猶恐夷性犬羊狡獪反覆仍飭該將領等督勇分途節節駐紮以備不虞均經先後奏明在案近來臣查夷情向化邊境頗安雖偶有偷襲原駐各營已敷分布所有添募之先鋒左右兩營應卽裁撤俾免虛糜現已札飭該營將應領勇餉截至本年年底止一律妥爲遣散仍復舊額而節餉需下部知

之○祭 歷代帝王廟遺魁斌行禮○乙巳予故總兵喻吉三戰績交國史館立傳附祀會國藩湖南江
寧等處專祠○沈秉成奏安徽省盤金一項向以米穀爲大宗近年收數短絀應解各餉時形拮据臣督
同司道竭力整頓情形前已奏明在案近來各省派員來皖採辦軍米賑糧每年數十萬石或先奏准免
釐或僅恃有護照概請免驗放行所免釐捐積計已屬不少而況持照辦運者半非奏委之員往往藉照
包攬不服盤查各卡委員以事關軍營急用賑撫要需大率未肯深究轉致紛紛效尤夾帶滋弊究其所
運之米是否全往給照之區猶不可知是鄰省兵民未必實得其益而本省餉項已先暗受其虧本年江
蘇浙江等省水災重大委員給照來辦賑濟米糧者又多於前江蘇省並有招商領照販運米石寬免稅
釐之請仰蒙 恩旨俞允 朝廷寬大之政原爲軫恤民艱俾資接濟第恐富商巨賈惟利是圖其販到
災區者不盡減價出售並非販往災區者亦且藉端影射實惠未及於窮戶漏卮轉便夫奸商徒令釐款
虛糜餉源更絀 臣維安徽省同遭水患其間秋收中稔之區農民以樂易錢固不能禁米出境鄰省軍食
賑需均關緊要亦何敢自分畛域競此釐收惟各餉之取資於釐金者周轉實艱不得不兼顧並籌以求
禁止弊端而各得實濟現與司道統籌大局酌議變通辦法嗣後各省購運軍米賑糧經過安徽省儘卡
循舊照章完釐飭令卡員將所收釐金按其護照所填數目另文中報專款存儲其蕪湖常新兩關及鳳

陽關亦一體照舊收稅另存一俟積有成數分別解還各該省凡車米稅釐以充軍餉賑糴稅釐以助賑
款俾食苦士卒待賑災黎皆得藉其餘利而夾帶影射之弊可以不禁而自除合無仰懇 天恩俯准所
請 勅部查照恭候 命下由臣咨會各省遵照辦理得 旨如所請行○丙午諭朕此次恭奉 慈禧
端佑康頤昭豫莊誠壽恭欽獻皇太后祇謁 東陵所有經行道路著派出之管道大臣暨直隸總督督
飭各該員弁兵丁嚴行稽查如有隨雇員役以及太監人等車馬踐踏並沿途藉差騷擾勒索等事卽著
該管大臣暨該督等查拿參奏至辦道各員如有草率偷減修墊不平藉口車馬踐踏希圖卸責情弊亦
著該督嚴查參辦○譚鈞培奏查滇省自肅清後改勇爲兵補足原額戰兵五成光緒二年前督臣劉長
佑挑練戰兵編三百七十人爲一營十年前督臣岑毓英督師出關因山徑險峻將調出戰兵改編二百
二十人爲一小營營分五哨哨大隊前後左右四哨各四隊隊各十人十一年入關將勇營及練軍綠
營一概考驗挑足戰兵十成以五成分防各邊五成留防內地邊防營制大率仍以二百人上下爲一小
營每營設管帶幫帶官各一員文案一員收支兼軍裝一員正哨官五員副哨兼差官五員哨舊二名十
四年復將內地戰兵調出三成一體編立營哨輪換操防其防勇各營亦仿小營編立惟幫帶文案哨弁
各員裁減有差現計調防八成戰兵七十七營留防勇十三營練黑防勇六營西南防土勇二十五營

均經先後奏咨在案本年十月因積欠月餉甚多請將各防營一律裁汰老弱三成暫留精壯七成營哨官各仍其舊亦經臣奏咨在案惟查營勇技藝貴於練習營伍尤宜整齊必可合而可分斯能守而能戰前項營勇以暫裁二成核計每營不過二百三四十人營伍既屬略零員弁益形繁冗臣與司道等通盤籌畫應卽酌量變通擬請將現在七成戰兵及留防營勇保黑防勇均以三營併爲一營每營四百二十人分編五哨中哨大隊前後左右四哨各九隊每隊什長一名戰兵九名每營設管帶一員中哨由各管帶自帶不另設哨官前後左右四哨各設哨官一員並於中哨提出戰兵二名兼充差官又提出四名兼充哨書又每營設文案一員收支兼軍裝一員以復舊制土勇亦以三營歸併一營營哨各官仍照舊設立無庸更張惟此次以散合整計戰兵編成二十六營內一營多二十五名粵勇編成五營內一營少九十八名保黑勇編成二營內每營多四十二名土勇編成十三營內一營少七十名雖未能盡歸劃一而爲數只此五營稽核較易至該兵勇等薪餉米糧等項仍照舊章分別支給似此量爲變通營伍之操練較爲整齊員弁之開支每年可省銀十六萬數千兩據雲南督後局司道湯聘珍等附具清摺詳請奏咨立案前來臣覆加查核實爲整飭防營權節餉需起見俟四川等省協餉解足營額復舊再將各勇營裁撤下部知之○丁未予四川提督宋慶在紫雲城內騎馬○戊申山西巡撫譚山卒賜卹如例○李鴻章

奏准戶部咨光緒十五年十二月初十日奉 上諭給事中黃賢奏請裁撤局員以免苛擾一摺直隸以升科地畝爲名於省城及各州縣創設清賦總局分局無非位置閒員清查升科係藩司應辦之事如果設立多局分派官紳不獨糜費且恐需索貽害著李鴻章將各局迅速裁撤復奏仍督率藩司飭令各州縣將應辦升科地畝認真經理嚴禁騷擾等因欽此仰見 聖主體恤民艱力除冗濫至意臣查清賦之舉緣順直兩處旗園地畝迷失多年無糧無租之地幾於接陌連阡自旗民交產兩次弛禁以後民間私相典賣規避升科既不向旗人納租亦不向州縣完糧殊不成事推原其故半由刁民軌法貪利半由報官勘丈吏胥留難需索是以相率隱匿糧多缺額迭經戶部飭查藩司督催卒難破其錮習因而經界不正訟獄繁興黑地控案層見疊出不特有虧 國課亦實不便民生戶部洞悉此弊於光緒十三年二月奏定順直各屬議租議賦章程聲明若不因時制宜趕緊清理恐礙輔數千頃公私地租賦盡歸無著奉 旨飭令嚴飭各州縣遵照辦理其時升任藩司松椿以事關全省利害必須妥慎籌辦方免掣掣按照部章將未盡事宜復經條議詳咨戶部核准照辦因事體重要案牘紛煩非酌派得力委員不能任事而舊吏積壓需索之弊又不可不防藩司一人耳目難周特派臬司會辦幫同糾察按照嘉慶道光年間設局清賦成案就司署東邊開房爲辦公之所名曰清賦局取其事有歸宿仍由藩司主政無非欲辦理順

連上下通氣杜弊便民起見應需局費無非由藩庫開款動支不准開銷正項此省城設局清賦實無位
假閒員虛糜經費之情形也至各州縣並未設有分局亦無派過委員惟據完縣知縣升懋圻稟清查荒
地擬派公正紳士勸辦就城內書院廟宇作爲公所每月酌定日期令鄉民自行呈報不經吏胥之手既
絕需索弊端亦免影射詭報應需茶飯紙張等項概由官爲備給該縣意在便民查無流弊稟經批准照
辦嗣該縣呈報荒地多而且速所擬辦法民皆樂從其餘州縣亦有稟准仿辦者現在辦理甫經數月各
屬紳民首報頗形踴躍共計升科地三千餘頃俱已遵章釐報先後報部核准爲數十年來所無之事其
中大半係旗民交產未經弛禁以前民人價買旗業從未投稅納糧者亦有不知來歷向無糧租者又有
因地無主久訟未結不能完糧者均照部章逐漸清結於 國課民生實屬有裨夫查荒升科乃地方官
應辦之政若辦法不得其宜難擬需索在所難免故必嚴約州縣引用正紳多張告示剴切曉諭不准牧
令浪差下鄉不准書役勾通包庇務使民無疑慮弊絕風清今荒地已查出數千頃成效灼然院司各衙
門並無一紙控詞其無苛騷擾動情弊尙屬可信然必有不便於勢豪猾吏之處節詞阻撓遂騰口說貴
賢原奏各節自係傳聞之誤茲既欽奉 諭旨敢不懷遵即將省城清賦局裁撤飭藩司恪遵部章詳悉
妥辦以專責成並通飭各州縣將應辦升科地畝認真經理嚴禁書吏不得稍有騷擾仍不得稍有鬆動

報聞○李鴻章奏前辦輪船招商局道員徐潤虧欠局款銀十六萬二千餘兩前據呈交銀七千餘兩又以房地產契抵銀十四萬數千兩下短銀兩延不完交經臣奏參革職勒令呈繳奉 旨所交房地確切估計不得稍涉含糊等因欽此欽遵在案旋卽迭次嚴追該革道除前交銀兩外又續交房產變價銀一千兩又交本局輪船股票銀八萬八千三百兩其餘五萬九千餘兩以上海自置房屋作抵押據道員王松森等核實估計按照現在時價約值銀六萬兩左右如市面興旺尙可起色現在收歸招商局營業所交股票亦有每年利息可收以之抵交欠款尙有盈餘並無絲毫含混查該革道前當商局創辦之始設法招徠股本開拓生意不無微勞足錄其虧短局款亦因船用浩繁根柢未深時局多變市面艱窘周轉爲難致有挪移並非有意侵蝕今既分別完交並將房產股票抵歸該局營業核計款項有盈無絀合無仰懇 天恩將二品銜已革浙江補用道徐潤准予開復以昭平允得 旨如所請行○己酉以劉瑞祺爲山西巡撫劉樹棠爲福建布政使○諭太僕寺卿張蔭桓著在總理各國事務衙門行走○庚戌以張國正爲江蘇按察使○辛亥諭前因朕本年萬壽恩典諭令吏部將李鴻章等子弟查明具奏候旨施恩茲據該部開單覆奏大學士直隸總督李鴻章之子李經邁兩江總督曾國荃之孫曾廣漢山東巡撫張曜之子張端理均著加恩以主事用○諭怡親王載敦奏病難就痊仍懇開去差使並請停俸一摺載敦

著准其開去差使加恩賞食半俸○前山西巡撫銜榮光卒賜卹如例○諭潘蔚奏請飭催臬司赴任等語貴州按察使田國俊於上年三月簡放後諭令來京陛見嗣據會國荃等奏准給假二月省親該臬司於五月間在江蘇交卸回籍迄今尚未到京著山西巡撫查明該臬司現在何處飭令迅速起程來京陛見毋再遲延干咎○癸丑諭軍機大臣等前據剛毅奏江蘇寶山縣境內蘆漢河年久失修該河迤西大壩壅遏水脈現在興工挑浚等情茲據給事中金壽松奏稱蘆漢河屢開卽塞自立壩以來漸定附近諸河幸免淤塞若將堤閘拆去利少害多請飭通籌全局倘業已興工宜將堤閘移建黑橋口或另勘舊地設閘並於吳淞等處下游一律細勘陸續擇要修治等語修濬河道原期保衛農田必須熟權利害爲一勞永逸之計未可專顧一隅致滋流弊著會國荃體察情形妥籌具奏原摺著鈔給閱看○以貴恆爲鎮白旗蒙古都統○乙卯 上幸 慈福端佑康頤昭豫莊誠壽恭欽獻皇太后祇謁 東陵啟鑒○丙辰諭朕此次恭謁 東陵所有道路經過之大興通州三河薊州遵化五州縣地方應徵本年錢糧均著加恩蠲免十分之三○豫山奏晉民樸厚成風向知畏法大赦以後良懦者填於溝壑強悍者不免驕張加以外來游民濫施煽惑勾結搶掠爲害地方臣於上年蒞任後嚴飭各屬力行保甲整頓捕務入冬以後復添派練軍扼要駐紮分段巡緝前經訪聞太原府屬之交城嵐縣興縣汾州府屬之汾陽臨縣永寧州

忻州屬之靜樂等七州縣地錯犬牙界阻萬山綿亙數百里樹木叢雜路徑崎嶇素爲萑苻淵藪雖經各地方官設法查緝而此拿彼竄勢難兼顧若不併力剿捕誠恐養癰貽禍並據各該州縣等密行稟請添兵拿辦當經飭派記名總兵陳兆蘭候補知府陳澤霖督帶練軍並分派候補正印人員馳往會同該州縣督率兵役堵截圍拿該委員等相機偵探時值歲暮猶復冒雪衝風不辭勞瘁據報先後拿獲巨盜李二等一十餘名訊認迭次搶劫有案均經批飭護解來省發交太原府訊辦一經審訊確實卽援照土匪章程就地正法以昭炯戒經此痛加懲創去冬盜賊潛蹤地方亦甚靜謐堪以仰慰宸廑惟查有交城縣知縣陳繼三性情拘泥緝捕不甚得力未便稍涉遷就致誤地方相應請旨將交城縣知縣陳繼三開缺留省另補所遺員缺應請扣留外補得旨如所請行○戊午歲暮奏奴才前經理藩院咨開據昭烏達盟長呈報克什克騰旗台吉吉朗阿爲首糾結馬賊在游牧處所劫掠牲畜財物請飭查拿等情咨行前來當經奴才檄飭營帶練軍協領穆哈展據派佐領福勒敦帶領駐防練軍五十名前往會同剿辦並飭查明是否卽係前獲正法之台吉吉凌阿遺黨務得確情據實呈報等因具奏在案茲據該協領稟據佐領福勒敦報稱奉派前往該旗會同嚴密訪查該旗所報之吉朗阿卽係前獲正法之吉凌阿前因其夥匪復出滋擾已經該盟旗聚斂多名而其黨逸夥黨仍盤踞搶劫復經該佐領督飭練兵等在於會

炭川金豆溝等處分投搜拿行至喀拉沁窪據鄉長報稱圍溝地方山重地險溝岔紛歧有夥匪盤踞山林之中時常騎馬持械下山擄害地方當卽督兵馳捕該匪膽敢放鎗接仗拒敵鎗傷眼縫傷鳳林該佐領卽督隊用鎗打斃賊首劉德才值天晚餘賊乘間潛逃一面撥兵追捕並起獲大洋鎗三桿小洋鎗二桿馬匹刀械等件平燬賊巢隨將受害眼縫擡至店房給資調養又擒獲賊犯王殿青張福閣連有等三名併在劉家窩鋪地方會同古北口練軍拿獲騎馬持械攔路搶劫拒敵官兵之賊犯劉煥年陳保漢等一併解交地方官審辦現在該旗地方肅清其餘各處亦均安靖並據昭烏達盟長亦以前情呈報前來奴才覆查無異該盟旗地方既已肅清自應將前派練軍撤回歸營以資訓練仍飭各該地方官暨蒙古各旗不時嚴密稽查務期盡絕根株勿留餘孽除受傷眼縫傷鳳林俟其鎗傷平復由奴才自行獎賞外惟該官軍等值此隆冬之際衝風冒雪不避艱險奮勇擊賊擒獲首逆不無微勞足錄合無仰懇 天恩可否量予獎敘之處出自 逾格鴻施如蒙 俞允再由奴才擇尤保獎以昭激勸得 旨著准其酌保數員毋許冒濫○己未賞給陞福寺喇嘛銀四兩○癸亥 上奉 慈禧端佑康頤昭豫莊誠壽恭欽獻貞太后祇諡 東陵禮成回鑾○祭 先農壇道載卽恭代行禮○甲子賞給請轎之鑾儀衛校尉銀兩○乙丑諭戶部右侍郎曾紀澤才猷練達任事勤能由隨生部屬承襲一等侯同治年間奉 特旨

以四五品京堂用朕御極後迭加遷擢淳陟卿貳簡任出使大臣聯絡邦交熟悉一切情形辦理悉臻妥協嗣在總理各國事務衙門行走並幫辦海軍事務均能盡心職守日前偶感微病當假調理方謂即可就痊長資倚畀忽聞溢逝軫卹殊深加恩賞給太子少保銜照侍郎例賜卹任內一切處分悉予開復應得卹典該衙門察例具奏伊子陸生曾廣鑒著俟服闋後由該部帶領引見兵部主事曾廣銓著以員外郎補用以示篤念遺臣至意○諭各省在籍官紳理宜收品勵行為鄉里矜式乃近來紳士往往不安本分動輒干預地方公事甚至藉端挾制官長以遂其假公濟私之計於風俗人心大有關繫亟應認真查究以挽澆風著各省督撫通飭所屬將前項弊端嚴行禁止倘有刁劣紳矜不知自愛仍有干預情事即著從嚴參辦至在京官員遇有本籍事件實係有關利弊者原准據實陳奏惟往往有逞意立言追經飭查或窒礙難行或全無影響殊非朝廷實事求是之意官員妄行條奏例有處分至本省事件耳目甚近尤應核實何得以無據之詞率行鳴演嗣後京官如有條陳本省事件失察者應如何嚴定處分之盛業吏部妥議具奏推之地方吏治全在疆臣整頓率屬實力經理果能破除情面事事秉公屬吏及紳矜等自無從把持舞弊胥官亦何從置喙經此次訓諭之後各省督撫務當振刷精神於察吏安民諸要務悉心整頓俾政治日臻上理不准仍蹈粉飾因循積習致干重咎將此通諭知之○丙寅諭殺虎口監督

恒壽奏差滿回京將交盈餘銀兩一摺所得盈餘等項銀一萬六千五十兩將均交廣儲司恒壽著毋庸
賞給○諭貴州按察使田國俊前已有旨催令迅速來京陛見茲據滿駿文奏該臬司現在患病未能起
程請賞假兩箇月等語田國俊著賞假一箇月假滿後卽行來京陛見毋再遲延○以徐用儀爲戶部右
侍郎仍兼署刑部右侍郎洪鈞爲兵部左侍郎○丁卯陶模奏據司道會詳據翰林院檢討張思榮翰林
院庶吉士薛宗辰內閣典籍薛浚舉人袁錢柏景偉廩生袁廣揚等稟稱長安縣前明工部侍郎馮從吾
萬厯己丑進士平生講求理學正色立朝不避權貴里居教授生徒多所成就學者稱少墟先生卒贈太
子少保謚恭定省城西門外舊有專祠旁有青門學會卽當日講學之地兵燹被燬該職等景仰前賢公
議捐資就原祠基址重加修建附立少墟書院爲士子肄業之所另購墓田爲後祠祭掃之需查定例各
省造先賢先儒祠宇必須查明請旨遵辦恭懇詳奏重修列入祀典所需經費該紳等自行捐備請免
報銷等情前來臣恭讀欽定明史內載從吾生而純慤長志濂洛之學罷官歸取先正格言體驗身心
造詣益進贊稱其與趙南星諸人齊名檢勵風節嚴氣正性侃侃立朝天下望之如泰山喬嶽等語伏念
關中夙稱理學之區自宋張載講明正學名儒輩出我朝中平讀從吾著述奮然興起遂成大儒於
時關學最盛兵燹後弦誦頽稀迄今休養多年生儒於詞章之學漸復舊觀惟本源實學仍難多觀今該

紳等援例呈請將馮從吾祠宇重加修建附設書院洵於崇祀前賢之中仍寓誘掖後進之意士習人心均有裨益下吏部議奏○是月俄羅斯國使臣庫滿回國參贊閩甯明署理